

20200420809

LIGJ PËR PROKURORI PUBLIKE

1. DISPOZITA THEMELORE

Neni 1

Me këtë ligj rregullohen themelimi, kompetenca, organizimi, funksionimi dhe abrogimi i prokurorisë publike, bazat dhe procedura për emërim dhe shkarkim të Prokurorit Publik të Republikës së Maqedonisë së Veriut, bazat për ndërprerje të funksionit Prokuror Publik i Republikës së Maqedonisë së Veriut, bazat për zgjedhje, shkarkim dhe procedurë disiplinore të prokurorëve publikë, bazat për ndërprerje të funksionit prokuror publik, si dhe çështje tjera në lidhje me punën e Prokurorisë Publike.

Neni 2

Prokuroria Publike është organ unik dhe i pavarur shtetëror i cili i ndjek kryerësit e veprave penale dhe të veprave tjera të ndëshkueshme të përcaktuara me ligj dhe kryen edhe punë tjera të përcaktuara me ligj.

Neni 3

- (1) Prokuroria Publike organizohet sipas parimeve të hierarkisë dhe subordinimit.
- (2) Prokuroria Publike është organ i pavarur shtetëror.
- (3) Respektimi i parimeve nga paragrafi (1) i këtij neni, nuk guxon ta rrezikojë pavarësinë dhe përgjegjësinë e çdo prokurori publik në kryerjen e funksionit.

Neni 4

- (1) Prokuroria Publike i kryen funksionet e veta në bazë të Kushtetutës dhe ligjeve dhe marrëveshjeve ndërkombëtare të ratifikuara në pajtim me Kushtetutën.
- (2) Prokuroria Publike në kryerjen e funksioneve të veta në mënyrë përkatëse i zbaton edhe dispozitat e Ligjit për përdorimin e gjuhëve.
- (3) Prokuroria Publike gjatë veprimit në mënyrë të drejtpërdrejtë i zbaton vendimet përfundimtare dhe ekzekutive të Gjykatës Evropiane për të Drejtat e Njeriut, të Gjykatës Ndërkombëtare Penale ose gjykatës tjetër, kompetencën e të cilës e pranon Republika e Maqedonisë së Veriut.
- (4) Prokuroria Publike gjatë veprimit i zbaton qëndrimet e shprehura në aktgjykime përfundimtare të Gjykatës Evropiane për të Drejtat e Njeriut.

Neni 5

Funksionin e Prokurorisë Publike e ushtrojnë Prokurori Publik i Republikës së Maqedonisë së Veriut dhe prokurorët publikë.

Neni 6

Funksioni i Prokurorit Publik është jokohërent me kryerjen e ndonjë funksioni apo profesioni tjetër publik përveç në raste të përcaktuara me ligj, ose me anëtarësim në parti politike ose pjesëmarrje në aktivitete të partisë politike.

Neni 7

(1) Prokurori Publik funksionin e kryen në mënyrë ligjore, të paanshme dhe objektive, i respekton dhe i mbron liritë dhe të drejtat e njeriut dhe të qytetarit dhe të drejtat e subjekteve tjera juridike dhe në suazat e kompetencave të veta, kujdeset për efikasitetin e ndjekjes penale.

(2) Prokurori Publik në kryerjen e funksionit siguron barazi për qytetarët para ligjit pa dallim nga raca, ngjyra e lëkurës, prejardhja, nacionaliteti, përkatësia etnike, gjinia, orientimi seksual, përkatësia e grupit të marginalizuar, gjuha, shtetësia, prejardhja sociale, arsimimi, religjioni ose bindja fetare, bindja politike, bindje tjetër, pengesa, mosha, gjendja familjare ose martesore, statusi pronësor, gjendja shëndetësore, cilësia personale dhe statusi shoqëror ose çdo lloj baze tjetër.

(3) Askush nuk mund të ndikojë mbi kryerjen e ligjshme, të paanshme dhe objektive të funksionit të prokurorisë publike.

Neni 8

(1) Prokuroria Publike duke e respektuar parimin e presumpsionit të pafajësisë, të drejtën e informimit dhe lirinë e medieeve, të drejtën e gjykimit të drejtë, të drejtën e mbrojtjes, integritetin, efikasitetin dhe besueshmërinë e hetimit, si dhe parimin e transparencës, e informon publikun për raste të veçanta për të cilat procedon, e të cilat shkaktojnë interes më të gjerë në publik ose janë të rëndësishme për realizimin e funksionit të saj.

(2) Prokurori Publik i Republikës së Maqedonisë së Veriut, prokurori i lartë publik, prokurori publik themelor i Prokurorisë Publike Themelore për Ndjekje të Krimit të Organizuar dhe Korrupsionit dhe prokurori publik i Prokurorisë Speciale Publike dhe prokurori themelor publik ose personat e autorizuar prej tyre, publikut dhe mjeteve për informim publik, u sigurojnë qasje të informatat për gjendjen e kriminalitetit dhe çështje tjera me rëndësi të përgjithshme nga puna e prokurorisë publike, në kushte të përcaktuara me ligj.

(3) Prokurori Publik i Republikës së Maqedonisë së Veriut ose personi i autorizuar prej tij mund të lejojë kontroll në regjistrimet dhe shkresat e prokurorisë Publike të cilat janë arkivuar. Kontrolli në regjistrime ose shkresa të arkivuara të cilat përmbajnë informata të klasifikuara, kryhet në pajtim me ligjin.

Neni 9

(1) Prokuroria Publike ka vulë që e përmban stemën dhe emrin e Republikës së Maqedonisë së Veriut, titullin e prokurorisë publike dhe selinë e saj.

(2) Në objektin ku është vendosur prokuroria publike vendosen flamuri i Republikës së Maqedonisë së Veriut, stema dhe emri i Republikës së Maqedonisë së Veriut, titulli i prokurorisë publike dhe selia e prokurorisë publike.

2. ORGANIZIM I PROKURORISË PUBLIKE

Neni 10

Prokuroria Publike është e organizuar si Prokurori Publike e Republikës së Maqedonisë së Veriut, prokurori të larta publike, Prokurori Themelore Publike për Ndjekje të Krimit të Organizuar dhe Korrupsionit dhe prokurori publike themelore.

Neni 11

(1) Prokuroria Publike themelohet për rajonin e gjykatës së shkallës përkatëse, pranë së cilës është kompetente të procedojë.

(2) Prokuroria Publike e Republikës së Maqedonisë së Veriut themelohet për gjithë territorin e Republikës së Maqedonisë së Veriut me seli në Shkup.

(3) Prokuroria e Lartë Publike themelohet për rajonin e gjykatës së apelit.

(4) Prokuroria Themelore Publike për Ndjekje të Krimit të Organizuar dhe Korrupsionit themelohet për gjithë territorin e Republikës së Maqedonisë së Veriut.

(5) Prokuroria Themelore Publike themelohet për rajonin e një ose më shumë gjykatave themelore.

Neni 12

Në Republikën e Maqedonisë së Veriut themelohen këto prokurori themelore publike:

1. Prokuroria Themelore Publike në Berovë për rajonin e Gjykatës Themelore në Berovë;
2. Prokuroria Themelore Publike në Manastir për rajonin e Gjykatës Themelore në Manastir;
3. Prokuroria Themelore Publike në Veles për rajonin e Gjykatës Themelore në Veles;
4. Prokuroria Themelore Publike në Gjevgjeli për rajonin e Gjykatës Themelore në Gjevgjeli;
5. Prokuroria Themelore Publike në Gostivar për rajonin e Gjykatës Themelore në Gostivar;
6. Prokuroria Themelore Publike në Dibër për rajonin e Gjykatës Themelore në Dibër;
7. Prokuroria Themelore Publike në Dellçevë për rajonin e Gjykatës Themelore në Dellçevë;
8. Prokuroria Themelore Publike në Kavadarç për rajonet e gjykatave themelore në Kavadarç dhe Negotinë;
9. Prokuroria Themelore Publike në Kërçovë për rajonin e Gjykatës Themelore në Kërçovë;
10. Prokuroria Themelore Publike në Kriva Pallankë për rajonin e Gjykatës Themelore në Kriva Pallankë;
11. Prokuroria Themelore Publike në Koçan për rajonet e gjykatave themelore në Koçan dhe Vinicë;
12. Prokuroria Themelore Publike në Kumanovë për rajonet e gjykatave themelore në Kumanovë dhe Kratovë;
13. Prokuroria Themelore Publike në Ohër për rajonin e Gjykatës Themelore në Ohër;
14. Prokuroria Themelore Publike në Prilep për rajonet e gjykatave themelore në Prilep dhe Krushevë;
15. Prokuroria Themelore Publike në Radovish për rajonin e Gjykatës Themelore në Radovish;
16. Prokuroria Themelore Publike në Resnjë për rajonin e Gjykatës Themelore në Resnjë;
17. Prokuroria Themelore Publike në Sveti Nikollë për rajonin e Gjykatës Themelore në Sveti Nikollë;
18. Prokuroria Themelore Publike në Shkup për rajonin e Gjykatës Themelore Penale Shkup;
19. Prokuroria Themelore Publike në Strugë për rajonin e Gjykatës Themelore në Strugë;
20. Prokuroria Themelore Publike në Strumicë për rajonin e Gjykatës Themelore në Strumicë;
21. Prokuroria Themelore Publike në Tetovë për rajonin e Gjykatës Themelore në Tetovë dhe
22. Prokuroria Themelore Publike në Shtip për rajonin e Gjykatës Themelore në Shtip.

Neni 13

Në Republikën e Maqedonisë së Veriut themelohen këto prokurori të larta publike:

1. Prokuroria e Lartë Publike në Manastir për rajonin e Gjykatës së Apelit në Manastir;
2. Prokuroria e Lartë Publike në Gostivar për rajonin e Gjykatës së Apelit në Gostivar;
3. Prokuroria e Lartë Publike në Shkup për rajonin e Gjykatës së Apelit në Shkup dhe
4. Prokuroria e Lartë Publike në Shtip për rajonin e Gjykatës së Apelit në Shtip.

Neni 14

(1) Në Republikën e Maqedonisë së Veriut themelohen Prokurori Publike për Ndjekje të Krimit të Organizuar dhe Korrupsionit.

(2) Në Prokurorinë Publike për Ndjekje të Krimit të Organizuar dhe Korrupsionit formohet seksion i specializuar për ndjekje të veprave penale të kryera nga persona me autorizime policore dhe pjesëtarë të policisë së burgut. Seksioni i specializuar ka shërbim profesional dhe hetues të prokurorisë publike nga qendra hetuese në pajtim me këtë ligj. Prokurorët publikë dhe udhëheqësin e seksionit të specializuar i sistemon prokurori publik i Prokurorisë Themelore Publike për Ndjekje të Krimit të Organizuar dhe Korrupsionit, nga radhët e prokurorëve publikë të asaj prokurorie, pas pëlqimit të marrë paraprakisht nga Prokurori Publik i Republikës së Maqedonisë së Veriut.

Neni 15

(1) Në prokurori publike me vëllim më të madh të lëndëve të natyrës së njëjtë, për shkak të efikasitetit dhe specializimit më të mirë në punën e prokurorisë publike, mund të formohen seksione si njësi të brendshme organizative. Me punën e seksionit udhëheq prokuror publik i përcaktuar sipas orarit vjetor për punë të prokurorisë publike në bazë të specializimit dhe profesionalizmit më të ngushtë të prokurorit publik që caktohet si udhëheqës i seksionit.

(2) Për rajonet e gjykatave të cilat kanë seksione për drejtësi të fëmijëve në prokuroritë themelore publike formohen edhe seksione për drejtësi të fëmijëve.

Neni 16

(1) Në kushte të përcaktuara me ligj në Prokurorinë Themelore Publike për Ndjekje të Krimit të Organizuar dhe Korrupsionit formohet qendër hetuese.

(2) Në kushte të përcaktuara me ligj në prokuroritë themelore publike, që procedojnë para gjykatave me kompetencë të zgjeruar formohet qendër hetuese ose seksion për hetime.

3. KOLEGJIUMI PROFESIONAL

Neni 17

(1) Kolegjiumi profesional (në tekstin e mëtejshëm: “kolegjiumi”) është trup i përhershëm profesional dhe këshillëdhënës në realizimin e funksionit të prokurorit publik në prokuroritë publike me së paku tre prokurorë publikë.

(2) Kolegjiumin e përbëjnë prokurori publik i prokurorisë publike dhe prokurorët publikë në prokurorinë publike.

(3) Kolegjiumi punon në mbledhje.

Neni 18

Kolegjiumi mundet në mënyrë të plotfuqishme të diskutojë dhe të japë propozime, mendime, vërejtje dhe sugjerime për çështje të caktuara nëse janë të pranishëm më tepër se gjysma e numrit të përgjithshëm të prokurorëve publikë.

Neni 19

(1) Kolegjiumi diskuton dhe i jep propozime, mendime, vërejtje dhe sugjerime prokurorit publik për:

- programin e punës, planin vjetor të punës dhe orarin e punës së prokurorëve publikë,
- çështje juridike konkrete që janë imponuar gjatë punës, mendime për draftin ose propozim-ligjin ose rregull tjetër,
- planin dhe metodën për pasqyrën e punës së prokurorive publike,
- qëndrimet parimore për çështje për zbatimin unik të ligjeve dhe rregullave tjera,
- politikën e ndjekjes dhe dënimit,
- çështjet e studimit të dukurive shoqërore me interes për realizimin e funksionit të prokurorit publik,

- lëndët për të cilat prokuroria publike ngrit procedurë para Gjykatës Kushtetuese të Republikës së Maqedonisë së Veriut,
- çështjet organizative dhe të tjera në realizimin e funksionit të prokurorit publik,
- dhënien e mendimit për kandidatët për prokurorë publikë, me kërkesë të Prokurorit Publik të Republikës së Maqedonisë së Veriut dhe
- çështjet tjera të përcaktuara me ligj.

(2) Kolegjiumi zgjedh anëtar të komisionit për përcaktimin e përgjegjësisë së prokurorit publik në kryerjen e funksionit të prokurorit publik.

Neni 20

(1) Prokuroria Publike e Republikës së Maqedonisë së Veriut sipas nevojës mban kolegjiun në përbërjen e zgjeruar me prokurorët e lartë publikë, prokurorin themelor publik të Prokurorisë Themelore Publike për Ndjekjen e Krimit të Organizuar dhe Korrupsionit dhe prokurorin publik të prokurorisë publike themelore, për çështjet lidhur me realizimin e funksionit të prokurorit publik dhe çështjet tjera me kompetencë të prokurorisë publike.

(2) Prokuroritë e larta publike sipas nevojës mbajnë kolegjiun në përbërjen e zgjeruar me prokurorë të veçantë publikë nga prokuroritë themelore publike, nëse diskutohet për çështjet lidhur me realizimin e funksionit të tyre të prokurorit publik.

Neni 21

Në mbledhjen e Kolegjiumit në të cilën debatohet për çështje profesionale mund të marrin pjesë këshilltarë dhe bashkëpunëtorë të Prokurorisë Publike.

Neni 22

Propozimet, mendimet, vërejtjet dhe sugjerimet e kolegjiunit do të konsiderohen të miratuara nëse pranohen nga shumica e prokurorëve publikë në atë prokurori publike dhe nga prokurori publik i asaj prokurorie publike.

4. KRYERJA E FUNKSIONIT TË PROKURORISË PUBLIKE

Neni 23

(1) Funksionin e prokurorisë publike në Prokurorinë Publike të Republikës së Maqedonisë së Veriut e kryejnë Prokurori Publik i Republikës së Maqedonisë së Veriut dhe prokurorët publikë në atë prokurori.

(2) Funksionin e prokurorisë publike në prokurorinë e lartë publike e kryejnë prokurori i lartë publik i prokurorisë së lartë publike dhe prokurorët publikë në atë prokurori.

(3) Funksionin e prokurorisë publike në Prokurorinë Themelore Publike për Ndjekjen e Krimit të Organizuar dhe Korrupsionit e kryejnë prokurori themelor publik i Prokurorisë Themelore Publike për Ndjekjen e Krimit të Organizuar dhe Korrupsionit dhe prokurorët publikë në atë prokurori.

(4) Funksionin e prokurorisë publike në prokurorinë themelore publike e kryen prokurori themelor publik i prokurorisë themelore publike dhe prokurorët publikë në atë prokurori.

(5) Prokurori Publik i Republikës së Maqedonisë së Veriut me kërkesë të prokurorit publik të Prokurorisë Publike, mund të autorizojë prokuror publik në prokurorinë tjetër publike të marrë veprime të caktuara për kryerje më të shpejtë dhe më efikase të veprimeve.

Neni 24

(1) Prokuroria Publike themelohet dhe shuhet me ligj.

(2) Në rast të shuarjes ose riorganizimit të prokurorisë publike, Këshilli i Prokurorëve Publikë i Republikës së Maqedonisë së Veriut do ta sistemojë prokurorin publik nga ajo prokurori publike në prokurorinë tjetër publike nga shkalla e njëjtë ose më e ulët.

(3) Prokurori Publik i Republikës së Maqedonisë së Veriut do t'i sistemojë të punësuarit nga Prokuroria Publike që shuhet në Prokuroritë tjera Publike në vende përkatëse të punës, me statusin e njëjtë të marrëdhënies së punës.

(4) Në rast të shuarjes së Prokurorisë Publike urdhrat për angazhim të hetuesve në atë prokurori pushojnë të vlejnë dhe hetuesit kthehen në institucionin nga i cili janë dërguar në Prokurorinë Publike.

(5) Mjetet financiare, obligimet e ndërmarra, marrëveshjet dhe kërkesat dhe prona e përgjithshme e tundshme dhe e patundshme e Prokurorisë Publike e cila shuhet kalojnë në Prokurorinë Publike të Republikës së Maqedonisë së Veriut.

Neni 25

(1) Prokurori Publik i Republikës së Maqedonisë së Veriut, prokurori i lartë publik i prokurorisë së lartë publike, prokurori themelor publik i Prokurorisë Themelore Publike për Ndjekjen e Krimit të Organizuar dhe Korrupsionit dhe prokurori themelor publik i prokurorisë themelore publike i përfaqësojnë prokuroritë publike, udhëheqin me punën e tyre, i kryejnë të drejtat dhe obligimet e përcaktuara me ligj dhe miratojnë orar vjetor për punë në fillim të çdo viti kalendarik.

(2) Prokurorin Publik të Republikës së Maqedonisë së Veriut, prokurorin e lartë publik të prokurorisë së lartë publike, prokurorin themelor publik të Prokurorisë Themelore Publike për Ndjekjen e Krimit të Organizuar dhe Korrupsionit dhe prokurorin themelor publik të prokurorisë themelore publike gjatë kohës së mungesës së tyre, i zëvendëson prokurori publik i asaj prokurorie, që ata do ta caktojnë me orarin vjetor për punë.

(3) Nëse prokurorit publik të prokurorisë publike i ka skaduar mandati, i ka pushuar funksioni ose është shkarkuar, Këshilli i Prokurorëve Publikë të Republikës së Maqedonisë së Veriut me vendim të miratuar nga shumica e votave nga numri i përgjithshëm i anëtarëve të Këshillit, cakton prokuror publik nga radhët e prokurorëve publikë në atë Prokurori Publike, i cili do ta kryejë detyrën deri në zgjedhjen e prokurorit publik në atë prokurori publike, e i përmbush kushtet për prokuror publik të asaj prokurorie, por jo më gjatë se gjashtë muaj.

(4) Nëse Prokurorit Publik të Republikës së Maqedonisë së Veriut i pushon funksioni ose është shkarkuar nga funksioni, Këshilli i Prokurorëve Publikë të Republikës së Maqedonisë së Veriut nga radhët e prokurorëve publikë në Prokurorinë Publike të Republikës së Maqedonisë së Veriut cakton prokuror publik që do ta ushtrojë funksionin deri në emërimin e prokurorit publik të Republikës së Maqedonisë së Veriut, por jo më gjatë se gjashtë muaj.

Neni 26

(1) Për shkak të vëllimit të rritur të punës ose për shkak të zvogëlimit të pjesës së mbetur të lëndëve të pazgjidhura, Prokurori Publik i Republikës së Maqedonisë së Veriut mundet përkohësisht të dërgojë prokuror publik në prokurori tjetër publike më së shumti për periudhën deri në një vit.

(2) Prokurori Publik që është dërguar në prokurori tjetër publike ka të drejtë ankese ndaj aktvendimit për dërgim në Këshillin e Prokurorëve Publikë të Republikës së Maqedonisë së Veriut. Vendimi i Këshillit të Prokurorëve Publikë është përfundimtar.

(3) Prokurori Publik nuk mund të dërgohet në prokurori tjetër publike pa pëlqimin e tij më tepër se një herë në pesë vjet.

(4) Gjatë dërgimit të përkohshëm të prokurorit publik në prokurori tjetër publike, lartësia e rrogës nuk mund t'i zvogëlohet.

(5) Prokurori themelor publik i Prokurorisë Themelore Publike për Ndjekjen e Krimit të Organizuar dhe Korrupsionit dhe prokurorët publikë në Prokurorinë Themelore Publike për Ndjekjen e Krimit të Organizuar dhe Korrupsionit nuk mund të dërgohen në prokurori tjetër publike

Neni 27

(1) Prokurori Publik i Republikës së Maqedonisë së Veriut është përgjegjës për gjendjet e përgjithshme lidhur me organizimin dhe kryerjen e funksioneve të prokurorisë publike dhe për punën e vet dhe për punën e prokurorisë publike përgjigjet para Kuvendit të Republikës së Maqedonisë së Veriut.

(2) Prokurorët publikë në Prokurorinë Publike të Republikës së Maqedonisë së Veriut për punën e tyre përgjigjen para Prokurorit Publik të Republikës së Maqedonisë së Veriut dhe para Këshillit të Prokurorëve Publikë.

(3) Prokurori i lartë publik për punën e vet përgjigjet para Prokurorit Publik të Republikës së Maqedonisë së Veriut dhe para Këshillit të Prokurorëve Publikë, ndërsa prokurorët publikë në prokurorinë e lartë publike për punën e tyre përgjigjen para prokurorit publik të Republikës së Maqedonisë së Veriut, prokurorit të lartë publik dhe para Këshillit të Prokurorëve Publikë.

(4) Prokurori themelor publik i Prokurorisë Themelore Publike për Ndjekjen e Krimit të Organizuar dhe Korrupsionit për punën e vet përgjigjet para Prokurorit Publik të Republikës së Maqedonisë së Veriut dhe para Këshillit të Prokurorëve Publikë, ndërsa prokurorët themelorë publikë në Prokurorinë Publike Themelore për Ndjekjen e Krimit të Organizuar dhe Korrupsionit për punën e vet përgjigjen para prokurorit publik të Republikës së Maqedonisë së Veriut, Prokurorit publik të asaj prokurorie publike dhe para Këshillit të Prokurorëve Publikë.

(5) Prokurori publik themelor për punën e vet përgjigjet para prokurorit publik të Republikës së Maqedonisë së Veriut, Prokurorit të Lartë Publik dhe para Këshillit të Prokurorëve Publikë, ndërsa prokurorët publikë në prokurorinë publike themelore për punën e vet përgjigjen para prokurorit publik të Republikës së Maqedonisë së Veriut, prokurorit të lartë publik, prokurorit themelor publik dhe para Këshillit të Prokurorëve Publikë.

Neni 28

(1) Mbikëqyrje mbi kryerjen me kohë dhe të ligjshme të funksionit të prokurorit publik të prokurorive më të ulëta publike kryen prokuroria më e lartë publike.

(2) Mbikëqyrje mbi kryerjen me kohë dhe të ligjshme të funksionit të prokurorit publik të Prokurorisë Themelore Publike për Ndjekjen e Krimit të Organizuar dhe Korrupsionit kryen Prokuroria Publike e Republikës së Maqedonisë së Veriut.

(3) Mbikëqyrje mbi punën administrative të prokurorisë publike kryen Prokurori Publik i Republikës së Maqedonisë së Veriut.

(4) Mënyra e kryerjes së mbikëqyrjes përcaktohet me rregullore që i miraton Këshilli i Prokurorëve Publikë të Republikës së Maqedonisë së Veriut.

(5) Rregullat për punën e brendshme të prokurorive publike i miraton Prokurori Publik i Republikës së Maqedonisë së Veriut.

5. NDËRMARRJA E NDJEKJES PENALE

Neni 29

(1) Prokurori Publik i Republikës së Maqedonisë së Veriut mund ta ndërmarrë ndjekjen penale dhe kryerjen e punëve të caktuara për të cilat është kompetent prokurori i lartë publik, ose prokurori themelor publik ose t'i autorizojë të mbajnë procedurë për lëndë të caktuara ose të kryejnë punë të caktuara me kompetencë të prokurorit tjetër publik.

(2) Prokurori Publik i Republikës së Maqedonisë së Veriut pa pëlqimin e prokurorit publik themelor të Prokurorisë Publike themelore për ndjekje të krimit të organizuar dhe korrupsionit nuk mund të ndërmarrë ndjekje penale ose kryerje të punëve të caktuara për të cilat është kompetente Prokuroria Publike themelore për ndjekjen e krimit të organizuar dhe korrupsionit ose të autorizojë Prokurori tjetër publike të mbajë procedurë për lëndë të caktuara ose të kryejë punë të caktuara me kompetencë të Prokurorisë Publike themelore për ndjekje të krimit të organizuar dhe korrupsionit, përveç nëse gjatë mbikëqyrjes nga neni 28 paragrafi (3) të këtij ligji përcaktohet se funksioni i prokurorit publik nuk kryhet në pajtim me afatet e përcaktuara në Ligjin për procedurë penale.

(3) Prokurori i lartë publik mund të ndërmarrë ndjekje penale ose kryerjen e punëve të caktuara për të cilat është kompetent prokurori publik në prokurorinë themelore publike nga territori i asaj prokurorie të lartë publike dhe të autorizojë prokuror publik në Prokurorinë Publike themelore nga territori i asaj Prokurorie të Lartë Publike të mbajë procedurë për lëndë të caktuara ose të kryejë punë të caktuara me kompetencë të prokurorit tjetër publik themelor nga territori i asaj Prokurorie të Lartë Publike.

(4) Veprimet nga paragrafët (1) dhe (3) të këtij neni mund të ndërmerren vetëm në rast kur Prokurori publik vepron në mënyrë joprofesionale, nuk i ndërmerr veprimet e nevojshme për ngritje dhe mbajtje të procedurës penale, për shkak të kryerjes së paligjshme, jo në kohë dhe të shkujdesur të funksionit prokuror publik, si dhe për shkak të kërcënimeve për jetën dhe shëndetin e prokurorit publik dhe familjes së tij.

(5) Prokurori Publik i Republikës së Maqedonisë së Veriut, përkatësisht prokurori i lartë publik për veprimet nga paragrafët (1), (2) dhe (3) të këtij neni miratojnë vendim me shkrim që përmban arsyetim për veprimet e ndërmarra.

6. KOMPETENCA E PROKURORISË PUBLIKE

Neni 30

(1) Prokuroria Publike vepron në kufijtë e kompetencës së vet reale dhe vendore, nëse me ligj nuk është përcaktuar ndryshe.

(2) Prokuroria Publike Themelore vepron para gjykatës themelore.

(3) Prokuroria e Lartë Publike vepron para gjykatës së apelit.

(4) Prokuroria Publike për Ndjekje të Krimit të Organizuar dhe Korrupsionit vepron para Gjykatës Themelore Penale.

(5) Prokuroria Publike e Republikës së Maqedonisë së Veriut vepron para Gjykatës Supreme të Republikës së Maqedonisë së Veriut.

(6) Prokuroria Publike vepron edhe para organeve tjera dhe personave tjerë juridike në rajonin e vet kur për këtë është e autorizuar me ligj.

Neni 31

(1) Në realizimin e funksionit të ndjekjes së autorëve të veprave penale dhe kundërvajtjeve, prokurori publik:

- e udhëheq procedurën parahetuese dhe në disponim i ka personat zyrtarë nga policia e jurisprudence,

- i jep propozim gjykatësit në procedurën paraprake për zbatim të masave të veçanta hetuese në pajtim me Ligjin për procedurë penale,

- lëshon urdhra për zbatimin e masave të veçanta hetuese në pajtim me Ligjin për procedurë penale,

- mundet vetë ta ndërmarrë çdo veprim të nevojshëm për zbulimin e veprës penale dhe zbulimin dhe ndjekjen e kryerësit të saj për të cilën me ligj është autorizuar Ministria e Punëve të Brendshme, Policia Financiare dhe Drejtoria Doganore,

- kryen kontroll në llogaritë bankare,
- miraton urdhër dhe zbaton procedurë hetuese;
- propozon masa të përkohshme për sigurimin e pronës ose sendeve të marra me veprën penale ose për zbatimin e masës së konfiskimit,
- jep urdhër për realizimin e ekspertizës,
- vendos për prolongim të ndjekjes penale në kushte dhe në procedurë të përcaktuara me ligj,
- propozon lëshim të urdhërndëshkimit në kushte të përcaktuara me ligj,
- negocion dhe merret vesh me të paditurin në kushte dhe në procedurë të përcaktuara me ligj,
- parashtron dhe përfaqëson akuza para gjykatave,
- parashtron ankesa kundër vendimeve gjyqësore të paplotfuqishme dhe mjete të jashtëzakonshme juridike kundër vendimeve të plotfuqishme gjyqësore,
- vendos për ankesa të të dëmtuarit në kushte dhe në procedurë të përcaktuara me ligj,
- vepron në procedurë për bashkëpunim juridik ndërkombëtar në lëndë penale në pajtim me autorizimet e përcaktuara me ligj,
- kryen edhe veprime tjera të përcaktuara me ligj për funksionimin efikas të sistemit juridik penal dhe parandalimin e krimit,
- kryen punë në pajtim me Ligjin për kundërvajtje.

(2) Prokurori Publik ngre procedura të veçanta dhe merr pjesë në to në pajtim me nenin 60 të këtij ligji, kur kjo është përcaktuar me ligj.

Neni 32

Prokuroria Themelore Publike për Ndjekje të Krimit të Organizuar dhe Korrupsionit është kompetente të veprojë në shkallë të parë:

- për vepra penale të kryera nga grupi i organizuar prej tre ose më shumë personave, që ekziston një periudhë të caktuar kohore dhe vepron me qëllim të kryerjes së një ose më shumë veprave penale për të cilat është paraparë dënim me burg prej së paku katër vitesh,
- për veprat penale të kryera nga personat me autorizime policore dhe pjesëtarë të policisë së burgut në pajtim me nenin 33 paragrafi (1) i këtij ligji,
- për vepra penale prodhim i paautorizuar dhe lëshim në qarkullim i drogave narkotike, substancave psikotrope dhe prekursorëve nga neni 215, paragrafi (3) kur bëhet fjalë për grup të organizuar ndërkombëtar, mashtrim në dëm të mjeteve të Bashkimit Evropian nga neni 249-a, larje parash dhe të ardhurave tjera nga vepra ndëshkuese nga neni 273, keqpërdorim i pozitës dhe autorizimit zyrtar nga neni 353 paragrafi (5), pranim i mitos nga neni 357 paragrafi (5) i këtij neni, dhënia e shpërblimit për ndikim kundërligjor nga neni 358-a, pranimi i shpërblimit për ndikim kundërligjor nga neni 359, fitim i kundërligjor i pronës nga neni 359-a, keqpërdorim i procedurës për thirrje publike, ndarje e marrëveshjes për prokurim publik ose partneritet publik privat nga neni 275-v, bashkim kriminal nga neni 394 nga Kodi penal,
- për veprat penale, dhënie të dëshmisë së rrejshme nga neni 367 paragrafët (3) dhe (4), pengim i dëshmitarit nga neni 368, pengim i drejtësisë nga neni 368-a, zbulim të identitetit të dëshmitarit të mbrojtur apo të rrezikuar, bashkëpunëtorit të drejtësisë apo viktimës që paraqitet në cilësi të dëshmitarit nga neni 369-a, pengim i personit zyrtar në kryerjen e veprimit zyrtar nga paragrafi 382 të Kodit penal, nëse këto vepra janë kryer lidhur me procedurat që i udhëheq Prokuroria Publike Themelore për Ndjekje të Krimit të Organizuar dhe Korrupsionit,
- për vepra penale rrezikim terrorist i rendit kushtetues dhe sigurisë nga neni 313, pjesëmarrje në ushtri, polici, formacione paraushtarake dhe parapolicore të huaj nga neni 322-a, bashkim për veprimtari armiqësore nga neni 324, organizim terrorist nga neni 394-a, terrorizëm nga neni 394-b, financim i terrorizmit nga neni 394-v, të gjitha veprat penale kundër shtetit, trafikim me njerëz

nga neni 418-a, trafikim me fëmijë nga neni 418-g, për veprat tjera penale kundër njerëzimit dhe të drejtës ndërkombëtare, nga kreu i tridhjetekatërt i Kodit penal, përveç për veprën penale trafikim të migrantëve nga neni 418-b,

- për vepra penale nga neni 218 – “ndotje e mjedisit jetësor dhe natyrës”, neni 218-a- “prodhim, tregti ose përdorim i substancave të cilat e varfërojnë shtresën e ozonit”, neni 219 “ndotja e ujit të pijshëm”, neni 230- “kërcënimi i mjedisit jetësor dhe natyrës me hedhurina”, neni 231- “grumbullim dhe disponim me materie nukleare” dhe neni 234 “vepra të rënda kundër mjedisit jetësor dhe natyrës” nga kapitulli i njëzetedytë-“VEPRA PENALE KUNDËR MJEDISIT JETËSOR DHE NATYRËS nga Kodi penal”, nëse janë kryer nga grup i organizuar dhe

- për vepra penale nga kapitulli i njëzetekatërt “VEPRA PENALE KUNDËR TRASHËGIMISË KULTURORE DHE RRALLËSIVE NATYRORE” NGA Kodi penal nëse janë kryer nga grup i organizuar.

Neni 33

(1) Seksioni i specializuar për ndjekje të veprave penale të kryera nga persona me autorizime policore dhe pjesëtarë të policisë së burgut është kompetent të veprojë:

- për vepra penale të kryera nga persona me autorizime policore dhe pjesëtarë të policisë së burgut gjatë kryerjes së detyrave dhe autorizimeve zyrtare,

- vepra penale të kryera jashtë shërbimit me përdorim të kërcënimit serioz, forcës ose mjeteve për detyrim që si pasojë ka vdekje, lëndim të rëndë trupor, lëndim trupor, privim kundërligjor nga liria, torturë dhe sjellje dhe ndëshkim e veprim tjetër të ashpër, jonjerëzor ose poshtërues nëse me ligj është paraparë ndjekje penale me detyrë zyrtare.

(2) Si person me autorizime policore në kuptim të paragrafit (1) të këtij neni nënkuptohen nëpunës policor, person i autorizuar zyrtar për siguri dhe kundërzbulim me autorizime policore, pjesëtarë të policisë financiare dhe policisë pyjore, persona të autorizuar me ligj të Drejtorisë Doganore që punojnë në zbulimin e veprave penale dhe persona të autorizuar zyrtarë të Ministrisë së Mbrojtjes që punojnë në zbulimin dhe hetimin e veprave penale.

(3) Prokurori publik në Seksionin e specializuar për ndjekje të veprave penale të kryera nga persona me autorizime policore dhe pjesëtarë të policisë së burgut, jashtë rasteve të parapara në paragrafin (1) të këtij neni, me detyrë zyrtare ngre procedurë për vlerësimin e bazës për përdorim të armës së zjarrit, si dhe përdorim të forcës ose mjeteve për detyrim që ka për pasojë vdekje ose lëndim të rëndë trupor nga personat nga paragrafi (2) i këtij neni.

(4) Për rastet nga paragrafi (3) i këtij neni, prokurori publik e njofton udhëheqësin e Seksionit të specializuar.

(5) Njësia organizative në Ministrinë e Punëve të Brendshme kompetente për kryerje të kontrollit të brendshëm dhe standardeve profesionale dhe organet tjera kompetente, ndërmarrin veprime për iniciimin e procedurës disiplinore lidhur me veprat nga paragrafi (1) i këtij neni, pas aprovimit të prokurorit publik kompetent nga Seksioni i specializuar për ndjekje të veprave penale të kryera nga personat me autorizime policore dhe pjesëtarë të burgut, në pajtim me paragrafin (2) i këtij neni.

(6) Prokurori publik në Seksionin e specializuar për ndjekje të veprave penale nga persona me autorizime policore dhe pjesëtarë të policisë së burgut udhëheq me procedurën paraprake dhe veprimet i ndërmerr në mënyrë të pavarur ose përmes hetuesve të prokurorisë publike.

Neni 34

Prokuroria Publike kujdeset për ligjshmërinë e masave dhe veprimeve të ndërmarra në procedurë parahetuese dhe kryen mbikëqyrje të respektimit të të drejtave të njeriut nga ana e personave të autorizuar zyrtarë nga neni 33 paragrafi (2) i këtij ligji.

7. VLERËSIMI I PUNËS SË PROKURORËVE PUBLIKË

Neni 35

Përcjellja e punës së prokurorit publik bëhet nëpërmjet vlerësimit të rregullt dhe të jashtëzakonshëm.

Neni 36

(1) Vlerësimi i rregullt i punës së prokurorëve publikë bëhet për periudhë prej katër vitesh raportuese, përfundimisht me fundin e qershorit të vitit rrjedhës, për punën e prokurorit publik në katër vitet paraprake.

(2) Nëse prokurori publik ka munguar më shumë se 2/3 e kohës për të cilën duhet të jetë i vlerësuar, nuk do të vlerësohet për atë periudhë. Periudha e vlerësimit fillon të rrjedhë nga fillimi i kthimit në punë të prokurorit publik.

(3) Vlerësimi i jashtëzakonshëm i punës së prokurorit publik bëhet në rast kur prokurori publik konkurron për zgjedhje në prokurori më të lartë publike, për prokuror publik të prokurorisë publike, për prokuror publik të Prokurorisë Publike për Ndjekje të Krimit të Organizuar dhe Korrupsionit të Lartë ose për anëtar të Këshillit të Prokurorëve Publikë të Republikës së Maqedonisë së Veriut.

(4) Nëse prokurori publik konkurron për zgjedhje në prokurori më të lartë publike ose për prokuror publik të prokurorisë publike, në vitin rrjedhës për vitin paraprak për të cilin tashmë është vlerësuar nëpërmjet vlerësimit të rregullt, në atë rast nuk bëhet vlerësimi i tij i jashtëzakonshëm.

(5) Vlerësim të punës së prokurorëve publikë në Prokurorinë Publike në Republikën e Maqedonisë së Veriut, prokurorëve të lartë publikë të prokurorive të larta publike dhe prokurorit publik të Prokurorisë Publike për Ndjekje të Krimit të Organizuar dhe Korrupsionit të Lartë jep Prokurori Publik i Republikës së Maqedonisë së Veriut.

(6) Vlerësim të punës së prokurorëve publikë në prokuroritë e larta publike dhe të prokurorëve themelorë publikë të prokurorive themelore publike jep prokurori i lartë publik i asaj prokurorie.

(7) Vlerësim të punës së prokurorëve publikë në Prokurorinë Themelore Publike për Ndjekje të Krimit të Organizuar dhe Korrupsionit jep prokurori themelor publik i asaj prokurorie.

(8) Vlerësim të punës së prokurorëve publikë në prokuroritë themelore publike jep prokurori i lartë publik me mendim të marrë paraprakisht të prokurorit themelor publik të asaj prokurorie.

(9) Vlerësimi i punës së prokurorit publik mund të jetë pozitiv ose negativ.

8. KRITERE PËR VLERËSIM

Neni 37

Kritere për vlerësim të punës së prokurorëve publikë janë:

- profesionalizmi dhe kualiteti në vendimet, mjetet juridike dhe shkresa tjera,
- azhurnimi dhe efikasiteti,
- paanshmëria dhe përgjegjshmëria,
- autoriteti dhe sjellja dinjitoze për funksionin,
- bashkëpunimi dhe raporti ndaj palëve dhe të punësuarve tjerë në prokurori,
- aftësia dhe gatishmëria për përsosje profesionale dhe arritje të dijenive të reja,
- aftësitë organizative.

Neni 38

Profesionizëm dhe kualitet në vendime, mjete juridike dhe dokumente tjera do të thotë zbatim i rregullt i Kushtetutës dhe ligjeve të Republikës së Maqedonisë së Veriut, marrëveshjeve ndërkombëtare të ratifikuara në pajtim me Kushtetutën, praktikës së Gjykatës Evropiane për të Drejtat e Njeriut dhe rregullave tjera, qasje e rregullt ndaj miratimit dhe përpilimit të vendimeve të prokurorisë publike, përfaqësimi i tyre, shkathtësia dhe aftësia oratorike dhe aftësia për argumentim dhe rezonim juridik në procedurë para gjykatave kompetente, moskomentim i lëndëve në publik dhe ruajtja si sekret atë që prokurori publik e kupton në ushtrimin e funksionit.

Neni 39

Azhurnitet dhe efikasitet në punë do të thotë në afate të përcaktuara ligjore veprim dhe vendimmarrje për kallëzime penale, zbatim efikas i procedurës paraprake, përfaqësimi i akuzës, pjesëmarrje në seanca para gjykatës dhe respektimi i afateve ligjore për parashtrimin e mjeteve të rregullta juridike.

Neni 40

(1) Punë e përgjegjshme do të thotë puna në pajtim me ligjet dhe respektim të udhëzimeve të obligueshme të përgjithshme, si dhe respektimi i afateve.

(2) Paanshmëri do të thotë qasje joselektive në zbatimin e rregullave për ndalim të diskriminimit, objektivitet dhe integritet personal i panënshtuar në çfarëdo qoftë ndikimi dhe presione të cilat do të mund të ndikojnë në zgjidhjen e lëndës dhe refuzim i dhuratave dhe donacioneve nga ata që mund të ndikojnë në zgjidhjen e lëndës ose mbajtje të marrëdhënieve bashkëpunimi me persona të tillë.

Neni 41

Autoritet dhe sjellje etike të denja për funksionin, do të thotë dinjitet dhe autoritet në mjedisin ku prokurori publik punon dhe jeton dhe përmbajtje të Kodit etik të prokurorëve publikë në Republikën e Maqedonisë së Veriut.

Neni 42

Bashkëpunim dhe marrëdhënie ndaj palëve dhe të punësuarve tjerë në prokurori do të thotë sjellje profesionale, precize dhe dinjitoze ndaj pjesëmarrësve në procedurë, në marrëdhëniet në prokurorinë publike dhe marrëdhëniet me të gjitha organet dhe organizatat tjera me të cilat në pajtim me ligjet, prokurori publik është i autorizuar të komunikojë dhe bashkëpunojë dhe ta përkrahin përsosjen profesionale dhe përparimin profesional të kolegëve.

Neni 43

Aftësi dhe përgatitje për përsosje profesionale dhe marrje të diturive të reja do të thotë pjesëmarrje në seminare dhe punëtori profesionale në organizim të Akademisë për Gjykatës dhe Prokurorë Publikë dhe organizata dhe asociacione tjera, pjesëmarrje si edukator, mentor, ligjërues, në aktivitete të Shoqatës së Prokurorëve Publikë dhe angazhim personal për avancim të kapacitetit personal profesional dhe intelektual, botim të punimeve shkencore dhe ngjashëm.

Neni 44

Aftësi organizuese do të thotë posedim të aftësive për udhëheqje me prokurorinë publike ose seksione në prokurorinë publike dhe krijim të marrëdhënieve për kryerje dhe përsosje të suksesshme dhe efikase të punës së përgjithshme në prokurorinë publike.

9. PROCEDURA PËR VLERËSIM

Neni 45

Vlerësimi i punës së prokurorëve publikë kryhet me kontroll të drejtpërdrejtë në pocedrimin e lëndëve, raporte mujore, nëpërmjet bisedës së drejtpërdrejtë me prokurorin publik i cili vlerësohet, shqyrtim të parashtesave, ankesave ose lëvdatave për punën e tij që regjistrohet në dosjen profesionale për çdo prokuror.

Neni 46

(1) Vlerësimi i punës së prokurorëve publikë formohet në bazë të të dhënave për ndjekje të punës dhe të dhënave nga dosja profesionale të prokurorit publik, të cilat si kritere të përcaktuara me këtë ligj janë shprehur në pikë të përcaktuara me rregullore.

(2) Pjesë përbërëse e vendimit për vlerësim është edhe formulari në të cilin janë përmbajtur kriteret e përcaktuara me këtë ligj sipas të cilave është vepruar, të cilin e përcakton Prokurori Publik i Republikës së Maqedonisë së Veriut.

(3) Qëllimi i vlerësimit është të shikohen problemet të cilat i ka prokurori publik në ushtrimin e funksionit, të shqyrtohen mundësitë për tejkalimin e tyre, si dhe për plotësimin e kriterëve për përparimin e tij.

Neni 47

Me kontroll të drejtpërdrejtë në punën e lëndëve të prokurorëve publikë përcaktohen:

- numri i kallëzimeve penale, lëndëve dhe parashtesave të pranuar,
- numri i kallëzimeve penale dhe lëndëve të zgjidhura në afatin e paraparë ligjor,
- numri i kallëzimeve penale dhe lëndëve të pazgjidhura dhe shkaqet për moszgjidhjen e tyre,
- kualiteti i veprimit të prokurorit publik, vendimeve të prokurorisë publike, përmbajtjes në formulimet ligjore, aftësisë për shprehje me shkrim dhe arsyetimit të qartë dhe preciz të vendimeve.

Neni 48

Aftësia organizuese e prokurorëve publikë të prokurorive publike, përkatësisht të udhëheqësve të seksioneve në prokuroritë publike, si dhe aftësia e tyre për krijim të prestigjit dhe autoritetit të prokurorisë publike dhe aftësia për vendosje dhe mbajtje të marrëdhënieve korrekte dhe të shëndosha në të njëjtën, përcaktohet me kontroll në regjistra të karakterit menaxhues administrativ, me bisedë të kryer të drejtpërdrejtë me prokurorin publik përkatësisht udhëheqësin e seksionit, shikim në raportet nga kontrollet e kryera dhe mbikëqyrje në punën e prokurorisë publike me të cilën udhëheq, si dhe raportet vjetore për efikasitet në realizimin e funksionit të prokurorit publik.

Neni 49

Vlerësimi i prokurorëve publikë kryhet në bazë të raporteve gjashtëmujore dhe vjetore, forma dhe përmbajtja e të cilëve përcaktohet me rregullore të cilën e miraton Prokurori Publik i Republikës së Maqedonisë së Veriut.

Neni 50

Mënyra e dhënies së pikave dhe shuma e pikave për kritere të veçanta në pajtim me nenin 46 paragrafi (1) të këtij ligji, do të përcaktohen me Rregullore të miratuar nga Prokurori Publik i Republikës së Maqedonisë së Veriut.

10. PROCEDURA PËR VLERËSIM TË SËRISHËM

Neni 51

Ekzemplari nga vendimi për vlerësim të punës së prokurorit publik dorëzohet te Këshilli i Prokurorëve Publikë, te prokurori publik për të cilin ka të bëjë vlerësimi dhe te Prokurori Publik i Republikës së Maqedonisë së Veriut.

Neni 52

Nëse prokurori publik është i pakënaqur nga nota të cilën e ka marrë, mund të parashtrojë kundërshtim me shkrim te Këshilli i Prokurorëve Publikë të Republikës së Maqedonisë së Veriut, në afat prej 8 ditësh nga dita e pranimi të vendimit.

Neni 53

(1) Këshilli i Prokurorëve Publikë të Republikës së Maqedonisë së Veriut në afat prej 30 ditësh nga dita e pranimi të kundërshtimit është i obliguar të miratojë vendim për të njëjtin.

(2) Para se të vendosë Këshilli i Prokurorëve Publikë i Republikës së Maqedonisë së Veriut mund të kryejë shikim në punën e prokurorit publik i cili e ka parashtuar kundërshtimin, të kryejë bisedë me të ose me prokurorin publik i cili e ka dhënë notën.

(3) Nëse Këshilli i Prokurorëve Publikë të Republikës së Maqedonisë së Veriut vlerëson se kundërshtimi ka bazë, me vendim do ta angazhojë prokurorin publik i cili e ka zbatuar procedurën për vlerësim, të realizojë vlerësim të sërishëm me ç'rast do t'i japë udhëzime konkrete sipas të cilave doemos duhet të veprojë.

(4) Në notën e sërishme të dhënë, prokurori i pakënaqur publik ka të drejtë kundërshtimi në afat prej tetë ditësh nga dita e pranimi të vendimit për notën e sërishme të dhënë.

(5) Pas kundërshtimit të dytë Këshilli i Prokurorëve Publikë i Republikës së Maqedonisë së Veriut miraton vendim me të cilin e vlerëson prokurorin publik.

(6) Vendimi i Këshillit të Prokurorëve Publikë të Republikës së Maqedonisë së Veriut është përfundimtar.

(7) Vendimi për kundërshtimin e deklaruar nuk mund të jetë më i pavoritshëm nga nota e dhënë fillimisht.

11. RAPORT I PUNËS

Neni 54

(1) Çdo prokurori publike përpilon raport vjetor për punën e vet.

(2) Prokuroria më e ulët publike raportin nga paragrafi (1) të këtij neni e dorëzon te prokuroria publike e drejtpërdrejtë më e lartë.

(3) Prokuroria Publike për Krim të Organizuar dhe Korrupsion të Lartë raportin nga paragrafi (1) të këtij neni e dorëzon te Prokuroria Publike e Republikës së Maqedonisë së Veriut.

(4) Prokuroria Publike e Republikës së Maqedonisë së Veriut, përpilon raport unik vjetor për punën e të gjitha prokurorive publike.

Neni 55

(1) Prokurori Publik i Republikës së Maqedonisë së Veriut raportin vjetor për punën e të gjitha prokurorive publike nga neni 54 paragrafi (4) të këtij ligji dhe për gjendjen me krimin në Republikën e Maqedonisë së Veriut e parashtron te Kuvendi i Republikës së Maqedonisë së Veriut.

(2) Raportin nga paragrafi (1) të këtij neni Prokurori Publik i Republikës së Maqedonisë së Veriut e dorëzon në shqyrtim te Këshilli i Prokurorëve Publikë i Republikës së Maqedonisë së Veriut, ndërsa për njoftim e dorëzon edhe te Qeveria e Republikës së Maqedonisë së Veriut, Gjykata Supreme e Republikës së Maqedonisë së Veriut dhe Ministria e Drejtësisë.

(3) Prokurori Publik i Republikës së Maqedonisë së Veriut një herë në vit parashtron raport për masa të veçanta hetuese te Kuvendi i Republikës së Maqedonisë së Veriut me përmbajtje të përcaktuar me ligj.

12. UDHËZIME TË DETYRUESHME TË PËRGJITHSHME ME SHKRIM

Neni 56

(1) Prokurori Publik i Republikës së Maqedonisë së Veriut ka të drejtë t'u japë udhëzime të detyrueshme të përgjithshme me shkrim me arsyetim prokurorit të lartë publik të prokurorisë së lartë publike, prokurorit publik të prokurorisë publike për ndjekje të krimit të organizuar dhe korrupsionit të lartë dhe prokurorit themelor publik të prokurorisë themelore publike.

(2) Prokuror i lartë publik ka të drejtë t'u japë udhëzime të përgjithshme me shkrim me arsyetim edhe prokurorëve themelorë publikë nga rajoni i vet.

(3) Udhëzimet nga paragrafët (1) dhe (2) të këtij neni kanë të bëjnë me ndërmarrjen e masave dhe aktiviteteve të caktuara për mbrojtjen e të drejtave dhe lirive themelore të njeriut dhe qytetarit, mbrojtje të interesit publik, për zbardhje dhe ndjekje më efikase të veprave penale dhe kryerësve të tyre, deponim të mjeteve juridike dhe zbatim të ligjeve.

(4) Prokurori Publik i Republikës së Maqedonisë së Veriut dhe prokurorët publikë të prokurorisë publike nuk mund të miratojnë udhëzime dhe drejtime të cilat kanë të bëjnë me punën e lëndëve konkrete të prokurorisë publike.

(5) Për dhënien e udhëzimeve të përgjithshme me shkrim nga paragrafi (2) i këtij neni, prokurori i lartë publik është i obliguar ta njoftojë Prokurorin Publik të Republikës së Maqedonisë së Veriut.

13. KUJDESTARITË

Neni 57

(1) Për shkak të kryerjes së pandërprerë të funksionit, në prokurorinë publike organizohen kujdestari të prokurorëve publikë.

(2) Orarin dhe kohëzgjatjen e kujdestarive e përcakton prokurori publik i prokurorisë përkatëse publike.

(3) Orarin dhe kohëzgjatjen e kujdestarive në Seksionin e specializuar për ndjekje të veprave penale të kryera nga persona me autorizime policore dhe pjesëtarë të policisë së burgjeve, i përcakton udhëheqësi i Seksionit të specializuar në fillim të çdo muaji.

(4) Rregullore për lartësinë e kompensimit për kujdestari miraton Prokurori Publik i Republikës së Maqedonisë së Veriut.

14. BASHKËPUNIMI NDËRKOMBËTAR

Neni 58

(1) Prokuroria Publike e Republikës së Maqedonisë së Veriut në suaza të marrëveshjeve ndërkombëtare të ratifikuara në pajtim me Kushtetutën dhe në pajtim me ligjin për bashkëpunim ndërkombëtar në materie penale, realizon bashkëpunim të drejtpërdrejtë me prokurori publike dhe organe tjera kompetente të shteteve tjera, veçanërisht në plan të parandalimit dhe ndjekjes së krimit të organizuar dhe formave tjera të rënda të krimit nëpërmjet shkëmbimit të drejtpërdrejtë të të dhënave, bashkëpunimit të drejtpërdrejtë, edukimit, specializimit të kuadrove dhe formave tjera të bashkëpunimit.

(2) Prokurori Publik i Prokurorisë Publike për Ndjekje të Krimet të Organizuar dhe Korrupsionit të Lartë do të kërkojë ndihmë juridike ndërkombëtare dhe bashkëpunim për çështje që janë në kompetencë të tij në mënyrë të pavarur, në pajtim me ligjin dhe marrëveshjet ndërkombëtare të ratifikuara në pajtim me Kushtetutën.

(3) Mënyrën e propozimit, shkëmbimit dhe dërgimit të prokurorit publik në institucione, agjenci, trupa apo zyra të Bashkimit Evropian ose organizata, institucione, trupa, misione dhe projekte tjera ndërkombëtare, me rregullore e përcakton Prokurori Publik i Republikës së Maqedonisë së Veriut.

15. INICIATIVA PËR VLERËSIM TË KUSHTETUTSHMËRISË DHE LIGJSHMËRISË

Neni 59

(1) Prokurori Publik i Republikës së Maqedonisë së Veriut para Gjykatës Kushtetuese të Republikës së Maqedonisë së Veriut parashtron iniciativë për ngritje të procedurës për vlerësim të përputhshmërisë së ligjit me Kushtetutën dhe për përputhshmërinë e dispozitave tjera me Kushtetutën dhe ligjet, nëse çështja për kushtetutshmërinë dhe ligjshmërinë vendoset në punën e prokurorisë publike.

(2) Prokuroritë themelore publike, prokuroritë e larta publike dhe Prokuroria Publike për Ndjekje të Krimet të Organizuar dhe Korrupsionit të Lartë e informojnë Prokurorinë Publike të Republikës së Maqedonisë së Veriut për çështje të kushtetutshmërisë dhe ligjshmërisë në punën e tyre.

16. KOMPETENCA NË PROCEDURA TJERA

Neni 60

Në procedurë civile dhe procedurat tjera gjyqësore, si dhe në procedurë administrative, prokurori publik ndërmerr veprime juridike për të cilat është i autorizuar me ligj.

17. EMËRIMI DHE ZGJEDHJA E PROKURORËVE PUBLIKË

Neni 61

(1) Si prokuror publik mund të emërohet, përkatësisht të zgjidhet personi i cili i plotëson kushtet si në vijim:

- të jetë shtetas i Republikës së Maqedonisë së Veriut,
- në mënyrë aktive ta zotërojë gjuhën maqedonase,
- të jetë i aftë për punë,
- të ketë mbaruar studime juridike me 300 SETK të fituara ose shkallën VII/1 të arsimit në fushën e shkencave juridike ose diplomë të nostrifikuar të studimeve juridike jashtë shtetit për 300 kredi të fituara dhe
- të ketë dhënë provimin e jurisprudencës në Republikën e Maqedonisë së Veriut.

(2) Gjatë zgjedhjes së prokurorëve publikë zbatohet parimi përfaqësimit përkatës dhe të drejtë të qytetarëve që u takojnë të gjitha bashkësive.

Neni 62

(1) Kushte të veçanta për zgjedhje të prokurorit publik të Republikës së Maqedonisë së Veriut, për prokuror publik në Prokurorinë Publike të Republikës së Maqedonisë së Veriut, për prokuror të lartë publik të prokurorisë së lartë publike, për prokuror publik në prokurorinë e lartë publike, prokuror publik të Prokurorisë publike themelore për ndjekje të krimet të organizuar dhe

korupsionit, prokurorit publik themelor në Prokurorinë publike themelore për ndjekje të krimit të organizuar dhe korupsionit, prokurorit publik themelor të prokurorisë publike themelore dhe prokurorit publik në prokurorinë publike themelore krahas kushteve nga neni 61 i këtij ligji janë:

- si Prokuror publik i Republikën e Maqedonisë së Veriut mund të emërohet personi i cili ka stazh pune të pandërprerë së paku dhjetë vjet si prokuror publik ose si gjykatës nga sfera e të drejtës penale,
- si prokuror publik në prokurorinë publike të Republikës së Maqedonisë së Veriut mund të zgjidhet person i zgjedhur i cili ka stazh pune të pandërprerë prej së paku tetë vitesh në Prokurorinë e Lartë Publike ose në Prokurorinë Publike për Ndjekje të Krimit të Organizuar dhe Korupsionit të Lartë dhe i cili është vlerësuar me notë pozitive në katër vitet e fundit,

- si prokuror i lartë publik i Prokurorisë së lartë publike mund të zgjidhet personi i cili ka stazh pune të pandërprerë si prokuror publik prej së paku tetë vitesh deri në momentin e paraqitjes për emërim dhe i cili është vlerësuar me notë pozitive në katër vitet e fundit,

- si prokuror publik në prokurorinë e lartë publike mund të zgjidhet personi i cili ka stazh pune të pandërprerë si prokuror publik prej së paku gjashtë vitesh deri në momentin e paraqitjes për emërim dhe i cili është vlerësuar me notë pozitive në katër vitet e fundit,

- si prokuror publik themelor i Prokurorisë Publike Themelore për ndjekje të krimit të organizuar dhe korupsionit mund të zgjidhet personi cili ka stazh pune të pandërprerë prej së paku gjashtë vitesh si prokuror publik deri në momentin e paraqitjes për emërim dhe i cili është vlerësuar me notë pozitive në tre vitet e fundit,

- si prokuror publik në Prokurorinë publike për ndjekje të krimit të organizuar dhe korupsionit mund të zgjidhet personi cili ka stazh pune të pandërprerë prej së paku katër vitesh si prokuror publik deri në momentin e paraqitjes për emërim dhe i cili është vlerësuar me notë pozitive në dy vitet e fundit,

- si prokuror publik themelor i prokurorisë publike themelore mund të zgjidhet personi i cili ka stazh pune të pandërprerë prej së paku gjashtë vitesh stazh si prokuror publik deri në momentin e paraqitjes për emërim dhe i cili është vlerësuar me notë pozitive në dy vitet e fundit,

- si prokuror publik në prokurorinë publike themelore mund të zgjidhet personi i cili ka kryer trajnim të përcaktuar me ligj në Akademinë për Gjykatës dhe Prokurorë Publikë.

(2) Prokuror publik në Prokurorinë Publike Themelore me stazh të prokurorit publik deri në tre vjet mund të veprojë në Prokurorinë Publike Themelore në të cilën është zgjedhur vetëm për lëndë për të cilat është përcaktuar kompetencë për veprim të gjykatave themelore me kompetencë themelore.

Neni 63

(1) Prokurorin publik të Republikës së Maqedonisë së Veriut, me propozim të Qeverisë së Republikës së Maqedonisë së Veriut, e emëron Kuvendi i Republikës së Maqedonisë së Veriut për periudhë prej gjashtë vitesh me të drejtë të riemërimit.

(2) Prokurorët publikë i zgjedh Këshilli i Prokurorëve Publikë të Republikës së Maqedonisë së Veriut pa kufizim të kohëzgjatjes së mandatit në kushte dhe procedurë të përcaktuara me ligj.

(3) Këshilli i Prokurorëve Publikë të Republikës së Maqedonisë së Veriut jep mendim për propozimin e Qeverisë së Republikës së Maqedonisë së Veriut për emërim dhe shkarkim të prokurorit publik të Republikës së Maqedonisë së Veriut.

Neni 64

(1) Kuvendi i Republikës së Maqedonisë së Veriut me propozim të Qeverisë së Republikës së Maqedonisë së Veriut e shpall emërimin e prokurorit publik të Republikës së Maqedonisë së Veriut në "Gazetën Zyrtare të Republikës së Maqedonisë së Veriut" dhe së paku në dy gazeta ditore nga të cilat njëra prej gazetave që botohet në gjuhën që e flasin së paku 20% e qytetarëve

që flasin gjuhë zyrtare të ndryshme nga gjuha maqedonase, më së voni dy muaj para kalimit të mandatit ose menjëherë pas zbrazjes së vendit. Prokurori publik i Republikës së Maqedonisë së Veriut është i detyruar që ta njoftojë Qeverinë e Republikës së Maqedonisë së Veriut për mbarimin e mandatit më së voni në afat prej tre muajsh para mbarimit të tij.

(2) Afati për parashtrim të fletëparaqitjeve është 15 ditë nga dita e botimit në “Gazetën Zyrtare të Republikës së Maqedonisë së Veriut”.

(3) Këshilli i Prokurorëve Publikë të Republikës së Maqedonisë së Veriut, me kërkesë të Qeverisë së Republikës së Maqedonisë së Veriut në afat prej 15 ditësh nga dita e pranimi të kërkesës në Qeverinë e Republikës së Maqedonisë së Veriut dorëzon mendim të arsyetuar pozitiv ose negativ në formë me shkrim për të gjithë kandidatët e paraqitur në konkurs që i plotësojnë kushtet në pajtim me ligj.

(4) Qeveria e Republikës së Maqedonisë së Veriut në Kuvendin e Republikës së Maqedonisë së Veriut dorëzon propozim për emërimin e prokurorit publik të Republikës së Maqedonisë së Veriut nga kandidatët e paraqitur për të cilët Këshilli i Prokurorëve Publikë të Republikës së Maqedonisë së Veriut ka dhënë mendim pozitiv. Për kandidatin që do ta propozojë Qeveria për prokuror publik të Republikës së Maqedonisë së Veriut, me propozimin dorëzohet edhe mendimi i Këshillit të Prokurorëve Publikë i Republikës së Maqedonisë së Veriut.

(5) Nëse Këshilli i Prokurorëve Publikë të Republikës së Maqedonisë së Veriut për shkaqe të arsyeshme në afatin nga paragrafi (3) i këtij neni nuk dorëzon mendim në Qeverinë e Republikës së Maqedonisë së Veriut, afati nga paragrafi (3) i këtij neni vazhdohet edhe për 15 ditë. Nëse edhe në këtë afat Këshilli i Prokurorëve Publikë të Republikës së Maqedonisë së Veriut nuk dorëzon mendim, konsiderohet se mendimi është pozitiv.

(6) Nëse Këshilli i Prokurorëve Publikë të Republikës së Maqedonisë së Veriut nuk jep mendim pozitiv për asnjërin prej kandidatëve të paraqitur Qeveria e Republikës së Maqedonisë së Veriut nuk mund të përcaktojë propozim për emërimin e prokurorit publik të Republikës së Maqedonisë së Veriut dhe do t'i propozojë Kuvendit që ta përsërisë konkursin nga paragrafi (1) i këtij neni.

Neni 65

(1) Prokurorët e lartë publik të prokurorisë së lartë publike dhe prokuroritë publike themelore të Prokurorisë publike themelore i zgjedh Këshilli i Prokurorëve Publikë të Republikës së Maqedonisë së Veriut për periudhë katërvjeçare, nga radhët e prokurorëve të zgjedhur publikë me të drejtë të rizgjedhjes.

(2) Prokurorët publikë në prokurorinë publike themelore për ndjekje të krimit të organizuar dhe korrupsionit, i zgjedh Këshilli i Prokurorëve Publikë të Republikës së Maqedonisë së Veriut nga radhët e prokurorëve të zgjedhur publikë për periudhë katërvjeçare me të drejtë të rizgjedhjes.

(3) Procedura për zgjedhje të prokurorit të lartë publik të prokurorisë së lartë publike, prokurorit publik themelor të prokurorisë publike themelore për ndjekje të krimit të organizuar dhe korrupsionit, dhe prokurorit publik themelor të prokurorisë publike themelore fillon tre muaj para mbarimit të mandatit për të cilin janë zgjedhur.

(4) Këshilli i Prokurorëve Publikë të Republikës së Maqedonisë së Veriut me vendim e cakton numrin e prokurorëve publikë në prokuroritë publike dhe e zbaton procedurën për zgjedhje dhe shkarkim të prokurorëve publikë.

(5) Numrin e prokurorëve publikë në Prokurorinë publike themelore për ndjekje të krimit të organizuar dhe korrupsionit e cakton Këshilli i Prokurorëve Publikë me propozim të prokurorit publik të Prokurorisë publike themelore për ndjekje të krimit të organizuar dhe korrupsionit varësisht nga nevojat, ndërlikimi dhe vëllimi i punës.

(6) Gjatë zgjedhjes së prokurorit publik nuk guxon të kryhet diskriminim në lidhje me racën, ngjyrën e lëkurës, nacionalitetit, prejardhjes etnike, religjionit ose bindjes, pengesës trupore, identitetit gjinor, orientimit seksual dhe bindjes politike.

(7) Gjatë zgjedhjes së prokurorit publik pa u prishur kriteret e përcaktuara me ligj do të zbatohet parimi i përfaqësimit përkatës dhe të drejtë të qytetarëve të cilët u takojnë të gjitha bashkësive në Republikën e Maqedonisë së Veriut.

(8) Prokuror publik nuk mund të zgjidhet personi i cili me prokurorin publik të asaj prokurorie publike është lidhje farefisnore në linjë të parë ose në linjë anësore deri në shkallë të katërt ose është bashkëshort-e i/e tij/saj, si dhe deri në shkallë të dytë në linjë krushqie.

Neni 66

(1) Prokurori publik themelor i Prokurorisë Publike Themelore për Krimin e Organizuar dhe Korrupsionin zgjidhet nga Këshilli i Prokurorëve Publikë sipas votave të përcaktuara nga të gjithë prokurorët publikë në Republikën e Maqedonisë së Veriut. Këshilli i Prokurorëve Publikë e emëron prokuror publik themelor në Prokurorinë Publike Themelore për Krimin e Organizuar dhe Korrupsionin, kandidatin i cili ka fituar më shumë vota nga lista e kandidatëve të paraqitur të cilët i plotësojnë kushtet në pajtim me këtë ligj.

(2) Prokurori publik themelor i Prokurorisë Publike Themelore për Krimin e Organizuar dhe Korrupsionin zgjidhet në kohëzgjatje prej katër vitesh, nga radha e prokurorëve publikë të zgjedhur me të drejtë të rizgjedhjes.

(3) Për zgjedhje të prokurorit publik themelor në Prokurorinë Publike Themelore për Krimin e Organizuar dhe Korrupsionin, Këshilli i prokurorëve publikë shpall konkurs i cili publikohet në Gazetën Zyrtare të Republikës së Maqedonisë së Veriut dhe së paku në dy gazeta publike nga të cilat njëra është në gjuhën zyrtare të ndryshme nga gjuha maqedonase që e flasin së paku 20% e qytetarëve të Republikës së Maqedonisë së Veriut.

(4) Pas përfundimit të konkursit Këshilli i Prokurorëve Publikë përgatit listë nga kandidatët e paraqitur të cilët i plotësojnë kushtet e parapara me këtë ligj.

(5) Këshilli i Prokurorëve Publikë formon Komision për zbatimin e votimit për zgjedhje të prokurorit publik themelor në Prokurorinë Publike Themelore për Krimin e Organizuar dhe Korrupsionin.

(6) Procedura për votim për zgjedhje të prokurorit publik themelor në Prokurorinë Publike Themelore për Krimin e Organizuar dhe Korrupsionin zbatohet në pajtim me dispozitat ligjit me të cilat rregullohet puna e prokurorëve publikë.

Neni 67

Për prokuror publik në Prokurorinë Publike të Republikës së Maqedonisë së Veriut, në prokuroritë e larta publike dhe në Prokurorinë publike themelore për ndjekje të krimit të organizuar dhe korrupsionit, Këshilli i Prokurorëve Publikë të Republikës së Maqedonisë së Veriut do të zgjedhë person me rezultate të vërtetuara në punë, aftësi për punë në lëndë të ndërlikuara, aftësi organizative për kryerje të punës dhe aftësi për koordinim në punë, i cili ka cilësi profesionale dhe i cili gëzon autoritet në kryerje të funksionit, në bazë të kriterëve vijuese:

1) njohuri profesionale, me ç'rast merren parasysh studimet e specializimit, pasuniversitare dhe pjesëmarrja në trajnimin e vazhdueshëm;

2) raportit ndaj punës dhe kryerja në kohë e punës si prokuror publik;

3) aftësisë për zgjidhjen profesionale të çështjeve juridike;

4) marrjes së punës plotësuese ose kryerja e funksionit të prokurorit publik nëpërmjet pjesëmarrjes në përgatitjen e rregullave, mentorimit, edukimit dhe ngjashëm;

5) gëzimit dhe ruajtjes së autoritetit të prokurorit publik dhe prokurorisë publike, që përcaktohet nga mënyra e komunikimit me palët dhe organet tjera, pavarësia, paanshmëria dhe besueshmëria në kryerjen e funksionit të prokurorit publik dhe jashtë tij.

Neni 68

(1) Prokurori i lartë publik i prokurorisë së lartë publike, prokurori i lartë publik në prokurorinë e lartë publike, prokurori publik i Prokurorisë Publike për Ndjekje të Krimit të Organizuar dhe Korrupsionit, prokurorët publikë themelorë në Prokurorinë Publike Themelore për Ndjekje të Krimit të Organizuar dhe Korrupsionit, dhe prokurori publik themelor i prokurorisë publike themelore zgjidhen nga radhët e prokurorëve publikë në Republikën e Maqedonisë së Veriut, në procedurë dhe në mënyrë siç bëhet zgjedhja e prokurorit publik në prokurorinë publike adekuatë.

(2) Prokurori publik i Republikës së Maqedonisë së Veriut i cili nuk do të riemërohet vazhdon ta kryejë funksionin e prokurorit publik në Prokurorinë Publike të Republikës së Maqedonisë së Veriut.

(3) Prokurori i lartë publik i prokurorisë së lartë publike i cili nuk do të rizgjidhet vazhdon ta kryejë funksionin e prokurorit publik në Prokurorinë e Lartë Publike.

(4) Prokurorin publik të Prokurorisë Publike Themelore për Ndjekje të Krimit të Organizuar dhe Korrupsionit i cili nuk do të rizgjidhet, Këshilli i Prokurorëve Publikë të Republikës së Maqedonisë së Veriut e sistemon si prokuror publik në Prokurorinë Publike në të cilën është zgjedhur.

(5) Prokurorin publik në Prokurorinë Publike Themelore për Ndjekje të Krimit të Organizuar i cili nuk do të rizgjidhet Këshilli i Prokurorëve Publikë të Republikës së Maqedonisë së Veriut e sistemon si prokuror publik në prokurorinë publike nga e cila është zgjedhur.

(6) Prokurorin themelor publik të prokurorisë publike themelore i cili nuk do të rizgjidhet, Këshilli i Prokurorëve Publikë e sistemon si prokuror publik në prokurorinë publike nga e cila është zgjedhur.

Neni 69

(1) Prokurori publik para hyrjes në funksionin e prokurorit publik jep deklaratë solemne, si vijon:

"Deklaroj dhe betohem se në kryerjen e funksionit prokuror publik do ta respektoj Kushtetutën e Republikës së Maqedonisë së Veriut, ligjet dhe marrëveshjet ndërkombëtare të ratifikuara në pajtim me Kushtetutën, se funksionin do ta kryej në mënyrë të ndërgjegjshme, të paanshme dhe të përgjegjshme dhe se do t'i mbroj liritë dhe të drejtat e njeriut dhe qytetarit dhe interesat e subjekteve tjera juridike".

(2) Kur jep deklaratë solemne prokurori publik mban togë.

(3) Prokurori publik i Republikës së Maqedonisë së Veriut deklaratën solemne e jep para Kryetarit të Kuvendit të Republikës së Maqedonisë së Veriut, ndërsa prokurorët publikë deklaratën solemne e japin në mënyrë të veçantë para Këshillit të Prokurorëve Publikë të Republikës së Maqedonisë së Veriut.

(4) Deklarata solemne jepet në gjuhën maqedonase dhe nënshkruhet në gjuhën maqedonase dhe në shkrimin e saj cirilik.

(5) Gjatë dhënies dhe nënshkrimit të deklaratës solemne nga prokurori publik pjesëtar i komunitetit i cili flet në gjuhën zyrtare që e flasin së paku 20% e qytetarëve, zbatohen dispozitat e Ligjit për përdorim të gjuhëve.

(6) Ekземplar nga deklarata solemne i jepet, prokurorit publik të emëruar përkatësisht, të zgjedhur.

18. TË DREJTAT DHE OBLIGIMET E PROKURORËVE PUBLIKË

Neni 70

(1) Prokurori publik nuk mund të arrestohet as të thirret në përgjegjësi për veprimin e ndërmarrë, mendimin e shprehur dhe miratimin e vendimit, përveç nëse në kryerjen e funksionit prokuror publik kryen vepër penale.

(2) Kundër prokurorit publik nuk mund të udhëhiqet procedurë për kompensim të dëmit ose procedurë tjetër nga ana e pjesëmarrësit në procedurë i cili është i pakënaqur nga vendimi i prokurorit publik.

(3) Për dëmin të cilin prokurori publik në kryerjen e funksionit do t'ua shkaktojë qytetarëve ose personave juridikë me punën e paligjshme përgjigjet Republika e Maqedonisë së Veriut.

(4) Kur dëmi nga paragrafi (3) i këtij neni është kryer me paramendim ose nga pakujdesia e vetëdijshme, për çka prokurori publik shkarkohet Republika e Maqedonisë së Veriut me anë të padisë mund të kërkojë nga prokurori publik ta kthejë shumën dëmit të paguar nga paragrafi (3) në lartësi të cilën do ta përcaktojë gjykata.

Neni 71

(1) Prokurori publik mund të jetë edukator ose të mbajë ligjërata në Akademinë e Gjykatësve dhe Prokurorëve Publikë, të japë mësim në institucionet e arsimit të lartë nga sfera e prokurorisë publike dhe të marrë pjesë në projekte shkencore dhe profesionale nga ajo sferë.

(2) Prokurori publik mund të japë mësim në institucionet e arsimit të lartë nga sfera e prokurorisë publike dhe të marrë pjesë në projekte shkencore dhe profesionale nga ajo sferë pas pëlqimit të dhënë paraprak nga Prokurori Publik i Republikës së Maqedonisë së Veriut, ndërsa Prokurori Publik i Republikës së Maqedonisë së Veriut pas pëlqimit të dhënë paraprak nga Këshilli i Prokurorëve Publikë të Republikës së Maqedonisë së Veriut.

Neni 72

(1) Prokurorit publik të emëruar ose të zgjedhur si anëtar i Këshillit të Prokurorëve Publikë të Republikës së Maqedonisë së Veriut ose si gjykatës ose prokuror në institucionin ndërkombëtar të jurisprudencës, gjykatës në Gjykatën Kushtetuese të Republikës së Maqedonisë së Veriut ose drejtor ose zëvendësdrejtor i Akademisë së Gjykatësve dhe Prokurorëve Publikë, funksioni prokuror publik i pezullohet gjatë kohës së kryerjes së funksionit për të cilin është zgjedhur ose emëruar.

(2) Aktvendim për pezullimin e funksionit prokuror publik nga paragrafi (1) i këtij neni miraton Këshilli i Prokurorëve Publikë të Republikës së Maqedonisë së Veriut.

(3) Pas skadimit të mandatit nga paragrafi (1) i këtij neni për të cilin është emëruar ose zgjedhur, prokurori publik ka të drejtë që në afat prej pesë ditësh të kthehet në prokurorinë publike nga e cila është zgjedhur për kryerje të detyrës tjetër.

Neni 73

Prokurori publik i gëzon të gjitha të drejtat nga marrëdhënia e punës që i takojnë sipas ligjit.

Neni 74

(1) Lartësia e rrogës dhe kompensimeve tjera të prokurorit publik rregullohen me ligj.

(2) Rroga e prokurorit publik gjatë kohëzgjatjes së funksionit prokuror publik nuk guxon të zvogëlohet, përveç në raste të përcaktuara me ligj.

Neni 75

(1) Kur prokurori publik sipas nevojës së shërbimit është dërguar përkohësisht që ta kryejë funksionin e prokurorit publik jashtë vendbanimit ka të drejtë të kompensimit për shpenzime të rritura për banimin e tij ose kompensim për shpenzime të transportit.

(2) Prokurori publik ka të drejtë të kompensimit për shpenzime të shpërnguljes në rast nga paragrafi (1) i këtij neni për të ose për familjen e tij në rastet kur është zgjedhur ose sistemuar në prokurori tjetër.

(3) Prokurori publik i Republikës së Maqedonisë së Veriut e përcakton lartësinë dhe mënyrën e pagesës së kompensimeve nga paragrafët (1) dhe (2) të këtij neni.

Neni 76

(1) Prokurori publik i cili nuk ka banesë personale në selinë e prokurorisë publike ka të drejtë të shfrytëzimit të banesës zyrtare përkatëse.

(2) Deri në realizimin e të drejtës nga paragrafi (1) i këtij neni, prokurori publik ka të drejtë të kompensimit për shpenzime të zmadhuara për banimin e tij ose për kompensimin e shpenzimeve reale rrugore.

Neni 77

(1) Prokurori publik ka të drejtë dhe obligim të përsosjes së vazhdueshme profesionale, gjatë kohëzgjatjes së funksionit në pajtim me ligjin.

(2) Nga mjetet për punë të prokurorive publike detyrimisht ndahen mjete për përsosje profesionale të prokurorëve publikë.

(3) Prokurorit publik i cili ndjek studime pasuniversitare në drejtësi dhe studime specialiste në drejtësi në shtet dhe jashtë shtetit, mund t'i ndahet bursë.

(4) Mjetet për bursë sigurohen nga buxheti i Prokurorisë Publike të Republikës së Maqedonisë së Veriut.

(5) Mënyrën e ndarjes së bursës e përcakton prokurori publik i Republikës së Maqedonisë së Veriut me rregullore.

Neni 78

(1) Prokurori publik ka legjitimacion të cilin e lëshon dhe e heq Këshilli i Prokurorëve Publikë të Republikës së Maqedonisë së Veriut.

(2) Këshilli i Prokurorëve Publikë të Republikës së Maqedonisë së Veriut me akt i përcakton formën dhe përmbajtjen e formularit të legjitimacionit, mënyrën e lëshimit dhe heqjes së tij.

Neni 79

(1) Të drejtat e veçanta të prokurorit publik në kryerjen e funksionit janë:

- qasja në informatat e klasifikuara pas certifikatës së sigurisë të marrë paraprakisht për qasje dhe shfrytëzim të informatave të klasifikuara,

- të ketë të drejtë të lejes për mbajtje të armës dhe blerje të municionit përkatës,

- të ketë mbrojtje të veçantë për personalitetin e tij, për familjen dhe pronën, pas kërkesës së prokurorit publik epror në polici në vendbanimin gjithmonë kur ekzistojnë shkaqe serioze për sigurinë e tij dhe

- të ketë dokument zyrtar të udhëtimit.

(2) Kur prokurori publik ose familja e tij i nënshtrohen dhunës ose kërcënimit për dhunë ose shqetësohen, përndiqen, frikësohen ose detyrohen në cilëndo mënyrë ose i nënshtrohen cilitdo lloji të mbikëqyrjes jopërkatëse, u garantohet dhe sigurohet:

- ndërmerren hapa për pengim të përsëritjes së incidentit dhe, aty ku është përkatëse, të parashtrajnë kallëzime penale,

- kompensim për vdekje ose lëndim të prokurorit publik ose familjes së tij që dalin nga sulmi nga person motivi i të cilit për sulmin lidhet me veprimin e prokurorit publik.

(3) Për të drejtat e veçanta nga paragrafi (1) alinetë 2 dhe 4 të këtij neni rregulla më të përafërta miraton prokurori publik i Republikës së Maqedonisë së Veriut.

(4) Të drejtat e veçanta nga paragrafi (1) alineja 3 të këtij neni i referohen edhe prokurorit publik në pension.

Neni 80

Prokurorët publikë mund të themelojnë shoqatë, për realizimin dhe mbrojtjen e interesave të tyre dhe avancimin e statusit profesional.

Neni 81

- (1) Prokurori publik suspendohet nga kryerja e funksionit derisa gjendet në paraburgim.
- (2) Prokurori publik mund të suspendohet nga kryerja e funksionit derisa zgjat procedura penale kundër tij ose kur është ngritur procedurë disiplinore.
- (3) Vendim për suspendimin e prokurorit publik nga funksioni në rastet nga paragrafët (1) dhe (2) të këtij neni miraton prokurori publik i Republikës së Maqedonisë së Veriut. Vendimi doemos duhet të përmbajë arsyetim të shkaqeve për suspendim të prokurorit publik nga kryerja e funksionit.
- (4) Kundër vendimit nga paragrafi (3) i këtij neni prokurori publik ka të drejtë të ankesës në Këshillin e Prokurorëve Publikë të Republikës së Maqedonisë së Veriut, në afat prej tetë ditësh nga dita e pranimi të vendimit.
- (5) Këshilli i Prokurorëve Publikë të Republikës së Maqedonisë së Veriut është i obliguar që në afat prej tetë ditësh nga pranimi i ankesës nga paragrafi (4) i këtij neni të miratojë vendim përfundimtar.

Neni 82

- (1) Prokurori publik është i detyruar ta ruajë reputacionin e funksionit që e kryen.
- (2) Prokurorët publikë dhe të punësuarit në shërbimin profesional të prokurorisë publike janë të detyruar që ta ruajnë si sekret atë që e kanë kuptuar nga palët për marrëdhëniet e tyre juridike dhe faktike në kuadër të kryerjes së shërbimit dhe garantojnë për fshehtësinë e të dhënave në të cilat publiku nuk ka qasje, ndërsa ka të bëjë me të dhënat për karakter personal të cilat nuk kanë ndikim për kryerje të funksionit.
- (3) Prokurori publik i Republikës së Maqedonisë së Veriut, prokurori i lartë publik i prokurorisë së lartë publike, prokurori publik themelore i Prokurorisë Publike Themelore për Ndjekje të Krimit të Organizuar dhe Korrupsionit dhe prokurori publik themelor i prokurorisë publike themelore munden që prokurorin publik ose të punësuarit në shërbimin profesional të prokurorisë publike t'i lirojnë nga obligimi për ruajtje të informatës së klasifikuar me shkallë adekuate të fshehtësisë të përcaktuar në pajtim me ligjin.
- (4) Për lirim nga obligimi nga paragrafi (3) i këtij neni vendim miraton prokurori publik i Republikës së Maqedonisë së Veriut, ndërsa për prokuror publik të Republikës së Maqedonisë së Veriut vendim miraton Këshilli i Prokurorëve Publikë të Republikës së Maqedonisë së Veriut.
- (5) Prokurori publik i Republikës së Maqedonisë së Veriut miraton Rregullore për informata të klasifikuara.

Neni 83

- (1) Funksioni prokuror publik është i papërputhshëm me funksionin deputet, anëtar të këshillit të komunës, përkatësisht Qytetit të Shkupit, me funksionet në organet shtetërore, komunën dhe Qytetin e Shkupit dhe me funksione tjera të përcaktuara me ligj.
- (2) Prokurori publik nuk mund të jetë anëtar i këshillit drejtues ose mbikëqyrës të shoqërisë tregtare ose person tjetër juridik i cili është themeluar për shkak të arritjes së fitimit.

Neni 84

- (1) Prokurori publik në lidhje me kryerjen e funksionit prokuror publik nuk guxon të pranojë dhurata, premtim për dhuratë ose të shfrytëzojë volitshmëri dhe lehtësime tjera.
- (2) Në lidhje me punën e prokurorit publik, nuk guxojnë të pranojnë dhurata, premtim për dhuratë ose dobi tjetër edhe bashkëshorti i tij dhe anëtarët tjerë të familjes, të afërmit dhe personat tjerë që jetojnë në bashkësi me prokurorin publik, përveç dhuratave protokollare në pajtim me ligjin.

Neni 85

Prokurori publik para gjykatave shfaqet në togë, dukjen dhe mënyrën e mbajtjes së të cilës e përcakton prokurori publik i Republikës së Maqedonisë së Veriut.

19. PUSHIMI I FUNKSIONIT DHE SHKARKIMI I PROKURORËVE PUBLIKË

Neni 86

(1) Prokurorit publik të Republikës së Maqedonisë së Veriut funksioni i pushon:

- me kërkesë personale,
- nëse e humb shtetësinë e Republikës së Maqedonisë së Veriut,
- nëse përherë e humb aftësinë për ushtrim të funksionit prokuror publik,
- nëse është zgjedhur ose emëruar në funksion tjetër publik ose
- nëse është i gjykuar me vendim të plotfuqishëm gjyqësor me dënim me burg në kohëzgjatje prej së paku gjashtë muajsh.

(2) Në rastet nga paragrafi (1) i këtij neni pushimin e funksionit prokuror publik të Republikës së Maqedonisë së Veriut e përcakton Kuvendi i Republikës së Maqedonisë së Veriut.

Neni 87

(1) Prokurorit publik funksioni i pushon:

- me kërkesë personale,
- nëse e humb shtetësinë të Republikës së Maqedonisë së Veriut,
- nëse përherë e humb aftësinë për ushtrim të funksionit prokuror publik,
- nëse i plotëson kushtet për pension të pleqërisë me të drejtë të vazhdimet në pajtim me Ligjin për marrëdhënie të punës,
- nëse në kërkesë të tij dhe me pajtim të tij është zgjedhur ose emëruar në funksion tjetër publik, përveç kur funksioni prokuror publik pushon me kushte të përcaktuara me këtë ligj ose
- nëse është i dënuar me vendim të plotfuqishëm gjyqësor me dënim me burg prej së paku gjashtë muaj.

(2) Në rastet nga paragrafi (1) i këtij neni pushimin e funksionit prokuror publik e përcakton Këshilli i Prokurorëve Publikë të Republikës së Maqedonisë së Veriut.

Neni 88

(1) Qeveria e Republikës së Maqedonisë së Veriut, pas mendimit paraprak nga Këshilli i Prokurorëve publikë të Republikës së Maqedonisë së Veriut, te Kuvendi i Maqedonisë së Veriut parashtron propozim për shkarkim të prokurorit publik të Republikës së Maqedonisë së Veriut.

(2) Prokurori publik i Republikës së Maqedonisë së Veriut shkarkohet nga funksioni prokuror publik para përfundimit të mandatit:

- për shkak të cenimit të rëndë disiplinor nga neni 91 alinetë 1 deri në 6 të këtij ligji nëse cenimi është kryer me qëllim ose pakujdesi evidente me faj të prokurorit publik të Republikës së Maqedonisë së Veriut, pa shkaqe të arsyeshme dhe nëse cenimi ka shkaktuar pasoja të rënda ose
- nëse është anëtar në parti politike.

(3) Iniciativë për shkarkim të prokurorit publik të Republikës së Maqedonisë së Veriut mund të parashtrorë Këshilli i Prokurorëve Publikë të Republikës së Maqedonisë së Veriut, në të cilën do t'i theksojë shkaqet, rrethanat dhe faktet nga të cilat është udhëhequr për parashtrimin e iniciativës.

(4) Qeveria e Republikës së Maqedonisë së Veriut propozimin për shkarkim të prokurorit publik të Republikës së Maqedonisë së Veriut e dorëzon te Këshilli i Prokurorëve Publikë të Republikës së Maqedonisë së Veriut, i cili është i obliguar në afat prej 15 ditësh nga dita e pranimit të propozimit, te Qeveria e Republikës së Maqedonisë së Veriut të dorëzojë mendim pozitiv ose negativ të arsyetuar në formë të shkruar.

(5) Në mbledhjen e Këshillit të Prokurorëve Publikë të Republikës së Maqedonisë së Veriut në të cilën debatohet për propozimin e Qeverisë së Maqedonisë së Veriut për shkarkim të prokurorit publik të Republikës së Maqedonisë së Veriut nuk merr pjesë prokurori publik i Republikës së Maqedonisë së Veriut.

(6) Prokurori publik i Republikës së Maqedonisë së Veriut ka të drejtë me shkrim të prononcohet për propozimin nga paragrafi (1) i këtij neni.

(7) Qeveria e Republikës së Maqedonisë së Veriut me propozimin për shkarkim në mënyrë të obligueshme e dorëzon te Kuvendi i Republikës së Maqedonisë së Veriut edhe mendimin nga paragrafi (4) i këtij neni.

(8) Nëse Këshilli i Prokurorëve publikë të Republikës së Maqedonisë së Veriut nga shkaqe të arsyeshme në afatin e caktuar nuk dorëzon mendim te Qeveria e Republikës së Maqedonisë së Veriut, afati nga paragrafi (4) i këtij neni vazhdohet edhe për 15 ditë. Nëse edhe në këtë afat Këshilli i Prokurorëve Publikë të Republikës së Maqedonisë së Veriut nuk dorëzon mendim, konsiderohet se nuk e përkrah propozimin e Qeverisë së Republikës së Maqedonisë të Veriut.

(9) Prokurori publik i Republikës së Maqedonisë së Veriut ka të drejtë të jetë i pranishëm në seancën e Kuvendit të Republikës së Maqedonisë së Veriut dhe të prononcohet për propozimin e Qeverisë së Republikës të Maqedonisë së Veriut për shkarkimin e tij.

Neni 89

(1) Prokurori publik në ushtrimin e funksionit të tij shkarkohet:

- për shkak të cenimit të rëndë disiplinor në pajtim me nenin 91 të këtij ligji ose
- nëse është anëtar në parti politike.

(2) Prokurori publik shkarkohet nga funksioni i vet në pajtim me bazat e parapara në nenin 91 të këtij ligji nëse:

- cenimi është kryer me qëllim ose pakujdesi evidente me faj të prokurorit publik, pa shkaqe të arsyeshme dhe
- cenimi ka shkaktuar pasoja të rënda.

(3) Propozimi për ngritje të procedurës për përcaktim të përgjegjësisë nga paragrafi (1) i këtij neni parashtrohet në afat prej tre muajsh nga dita e kuptimit, por jo më gjatë se dy vjet nga dita kur është kryer cenimi.

(4) Në rast të formës më të lehtë të cenimit të bazave nga paragrafi (1) alineja 1 të këtij neni, prokurorit publik mund t'i shqiptohet masë disiplinore.

(5) Me ditën e plotfuqishmërisë së vendimit për shkarkim të prokurorit publik nga Këshilli i Prokurorëve Publikë të Republikës së Maqedonisë së Veriut, sipas bazave nga paragrafi (1) i këtij neni, prokurorit publik i pushon e drejta e rrogës.

(6) Prokurorët publikë shkarkohen me shumicë të votave nga numri i përgjithshëm i anëtarëve të Këshillit të Prokurorëve Publikë të Republikës së Maqedonisë së Veriut, në mbledhje në të cilën marrin pjesë së paku dy të tretat e numrit të përgjithshëm të anëtarëve.

(7) Prokurori publik themelor i Prokurorisë Publike Themelore për Ndjekje të Krimit të Organizuar dhe Korrupsionit dhe prokurorët publikë në Prokurorinë Publike Themelore për Ndjekje të Krimit të Organizuar dhe Korrupsionit shkarkohet me shumicë të dy të tretave nga numri i përgjithshëm i anëtarëve të Këshillit të Prokurorëve Publikë të Republikës së Maqedonisë së Veriut.

20. CENIME DISIPLINORE

Neni 90

Cenime disiplinore të kryera nga prokurori publik janë:

- Cenim i rëndë disiplinor dhe
- Cenim i lehtë disiplinor.

Neni 91

Cenim i rëndë disiplinor konsiderohet:

- cenim më i rëndë i rendit publik dhe paqes dhe forma tjera më serioze të sjelljes të pahijshme me të cilën prishet autoriteti i prokurorisë publike dhe autoriteti i tij,
- nëse refuzon të parashtojë deklaratë për gjendjen pronësore dhe interesave në pajtim me ligj ose nëse të dhënat e përmbajtura në deklaratë në masë të madhe janë të pavërteta,
- shkelja e dukshme e rregullave për përjashtim në situata në të cilat prokurori publik ka qenë në dijeni ose është dashur të dijë për ekzistim të ndonjëres nga bazat për përjashtim të parapara me ligj,
- nëse me aktgjykim të plotfuqishëm gjyqësor është i dënuar me dënim më të shkurtë se 6 muaj burg ose sanksion tjetër penal për vepër penale që është rezultat i drejtpërdrejtë në veprimin në ushtrimin e funksionit të prokurorisë publike, me qëllim ose me pakujdesi të vetëdijshme ose
- nëse në mënyrë të paautorizuar jep informata të klasifikuara, përkatësisht nxjerr informata dhe të dhëna për lëndë gjyqësore me çka cenohet detyrimi për mbrojtje të fshehtësisë së procedurës së përcaktuar me ligj dhe kur publiku është i përjashtuar në pajtim me ligj,
- nëse me qëllim dhe në mënyrë të paarsyeshme bën gabim të madh profesional, me ç'rast interpretimi i ndryshëm i të drejtës dhe fakteve nuk mund të paraqesë bazë për përcaktim të përgjegjësisë së prokurorit publik,
- pa mundëson ushtrim të mbikëqyrjes në punën e tij nga prokurori më i lartë publik,
- pa shkaqe të arsyeshme nuk vepron në lëndët në afatet e përcaktuara ligjore dhe për shkak të të cilës dukshëm zgjatet procedura ose ka ndodhur parashkrimi i ndjekjes penale,
- nëse pa shkaqe të arsyeshme nuk i merr në punë lëndët sipas renditjes siç janë pranuar nëpërmjet sistemit informatik për menaxhim me lëndët në prokurorinë publike,
- dy herë të njëpasnjëshme është i vlerësuar negativisht, në pajtim me procedurën e përcaktuar me ligj ose
- nuk vepron sipas udhëzimeve të përgjithshme të obligueshme të prokurorit më të lartë publik, kur ato janë dhënë në pajtim me ligj.

Neni 92

Cenim i lehtë disiplinor konsiderohet:

- cenime më të lehta të rendit publik ose forma tjera më të lehta të sjelljes së pahijshme me të cilën prishet autoriteti i prokurorisë publike dhe autoriteti i saj,
- mosplotësim i obligimeve të mentorimit,
- cenim i rregullave për mungesë nga puna,
- lëshon të paraqitet ose vonohet në mënyrë të paarsyeshme në debatet e caktuara ose seanca para gjykatës,
- mosrespektim i nenit 71 paragrafit (2) të këtij ligji,
- mosndjekje e trajnimeve të obligueshme ose
- mosmbajtje e togës gjyqësore gjatë gjykimeve.

21. PROCEDURA DISIPLINORE

Neni 93

(1) Procedura për përcaktim të përgjegjësisë së prokurorit publik për cenim të kryer disiplinor zbatohet pas propozimit të arsyetuar të prokurorit publik të Republikës së Maqedonisë së Veriut për të gjithë prokurorët publikë dhe pas propozimit të arsyetuar të prokurorit të lartë publik të Prokurorisë së Lartë Publike për prokuror publik të Prokurorisë së lartë publike, për prokurorë themelor publik në Prokurorinë themelore publike, dhe për prokurorë publik në Prokurorinë Themelore Publike, me detyrë zyrtare ose pas kuptimit të marrë për cenim të kryer. Ndaj propozimit për ngritje të procedurës disiplinore, parashtruesi është i obliguar të dorëzojë dëshmi

për cenim të kryer disiplinor. Procedurë për përcaktimin e përgjegjësisë së prokurorëve publikë për cenimin e kryer disiplinor ngrihet në afat prej gjashtë muajsh nga dita e mësimit për cenimin e kryer, por jo më vonë se tre vjet nga dita e kryerjes së cenimit.

(2) Procedurën për përcaktim të përgjegjësisë së prokurorit publik në ushtrimin e funksionit të prokurorisë publike e zbaton komisioni prej pesë anëtarësh ose zëvendës të tyre prej të cilëve nga një nga prokuroritë e larta publike dhe një anëtar nga Prokuroria Publike e Republikës së Maqedonisë së Veriut të zgjedhur nga kolegji i tyre nga ato prokurori. Anëtarë ose zëvendësanëtarë të komisionit është i obliguar të përjashtohet nëse i njëjti paraqitet si parashtrues i propozimit.

(3) Para ngritjes së procedurës komisioni pas pranimit të lëndës, pa prolongim, do të kërkojë nga prokurori publik kundër të cilit është propozuar propozimi për ngritje të procedurës, me shkrim të prononcohet për konstatimet në propozimin në afat prej pesë ditësh pas njoftimit.

(4) Nëse komisioni vlerëson se nuk ekziston dyshim i bazuar për cenim të kryer disiplinor të ngritur nga prokurori publik do të miratojë konkluzion me të cilin do të konstatohet se nuk do të ngrëjë procedurë.

(5) Nëse komisioni vlerëson se propozimi është i bazuar, do të miratojë aktvendim për ngritje të procedurës disiplinore.

(6) Prokurori publik kundër të cilit mbahet procedurë disiplinore ka të drejtë të dëgjohet para komisionit për përcaktim të përgjegjësisë disiplinore në prani të mbrojtësit, si dhe të propozojë dëshmi në dobi të vet.

(7) Nëse komisioni me shumicë të votave nga numri i përgjithshëm i anëtarëve përcakton se është kryer cenim disiplinor do të miratojë aktvendim dhe do të shqiptojë një nga sanksionet e përcaktuara nga neni 95, paragrafi (1) alinetë 1 dhe 2 dhe paragrafi (2) alineja 1 të këtij ligji.

(8) Gjatë zbatimit të votimit për llojin e masës disiplinore, anëtarët e Komisionit votojnë duke filluar nga më të rëndat kah më të lehtat.

(9) Me miratim të vendimit për shqiptim të masës disiplinore votimi ndërpritet.

(10) Nëse pas votimit për secilën nga masat disiplinore, për asnjë nuk është miratuar vendim me shumicë nga numri i përgjithshëm i anëtarëve të Komisionit, votimi nuk përsëritet, përveç nëse në seancën e njëjtë nuk është parashtruar propozim nga numri i përgjithshëm i anëtarëve për përsëritje të votimit për një nga masat.

(11) Nëse shumica e anëtarëve të Komisionit konsiderojnë se gjatë procedurës janë përcaktuar dëshmi për ekzistim të ndonjëres nga bazat ligjore për shkarkim të prokurorit publik, mund të propozojnë shkarkim të Këshilli i Prokurorëve Publikë të Republikës së Maqedonisë së Veriut ndërsa propozimi dorëzohet te prokurori publik kundër të cilit mbahet procedura. Pas propozimit për shkarkim prokurori publik ka të drejtë ankese te Këshilli i Prokurorëve Publikë të Republikës së Maqedonisë së Veriut në afat prej 7 ditësh nga dorëzimi i propozimit.

Neni 94

(1) Komisioni shqipton masë disiplinore nga neni 95 paragrafi (1) alinetë 1 dhe 2 dhe paragrafi (2) alineja 1 të këtij ligji. Pas ankesës së vendimit të Komisionit dhe pas ankesës së parashtruar kundër propozimit për shkarkimin ose pas kalimit të afatit kur ankesa nuk është parashtruar vendos Këshilli i Prokurorëve Publikë të Republikës së Maqedonisë së Veriut, i cili mund ta anulojë, ndryshojë ose vërtetojë vendimin e komisionit dhe ta pranojë ose refuzojë propozimin për shkarkim.

(2) Vendim për shkarkim të prokurorit publik miraton Këshilli i Prokurorëve publikë të Republikës së Maqedonisë së Veriut në procedurë të përcaktuar me ligj.

(3) Vendim për shkarkim të prokurorit publik nga paragrafi (2) i këtij neni Këshilli miraton me shumicë të votave nga numri i përgjithshëm i anëtarëve.

(4) Vendim për shkarkim të prokurorit publik themelor të Prokurorisë Publike Themelore për Ndjekje të Krimit të Organizuar dhe Korrupsionit miraton Këshilli i Prokurorëve Publikë të Republikës së Maqedonisë së Veriut me shumicë të dy të tretave të numrit të përgjithshëm të anëtarëve.

(5) Kundër vendimit të Këshillit të Prokurorëve Publikë të Republikës së Maqedonisë së Veriut me të cilin është shqiptuar masë shkarkim i funksionit, prokurori publik ka të drejtë të ngrejë kontest në gjykatën kompetente.

(6) Rregulloren për mënyrën e zbatimit të procedurës për përcaktim të përgjegjësisë së prokurorit publik, pas propozimit të prokurorit publik të Republikës së Maqedonisë së Veriut, e miraton Këshilli i Prokurorëve Publikë të Republikës së Maqedonisë së Veriut.

22. MASA DISIPLINORE

Neni 95

(1) Për cenim të përcaktuar të lehtë disiplinor të prokurorit publik, mund të shqiptohet një nga masat e theksuara disiplinore:

- vërejtje me shkrim,
- zvogëlim i rrogës prej 15% nga rroga mujore e prokurorit publik në kohëzgjatje prej një deri në gjashtë muaj.

(2) Për cenim të përcaktuar të rëndë disiplinor të prokurorit publik mund të shqiptohet një nga masat e theksuara disiplinore:

- zvogëlim i rrogës prej 15% deri në 30% nga rroga mujore e prokurorit publik në kohëzgjatje prej një deri në gjashtë muaj dhe
- shkarkim.

23. KËSHILLTARËT DHE BASHKËPUNËTORËT E PROKURORISË PUBLIKE

Neni 96

(1) Në Prokurorinë Publike për kryerjen profesionale të lidhura me kryerjen të funksionit të prokurorit publik ka këshilltarë të pavarur të prokurorisë publike, këshilltarë të lartë të Prokurorisë publike, bashkëpunëtorë profesionistë të Prokurorisë Publike dhe bashkëpunëtorë të ri të Prokurorisë publike më së paku 300 kredi të arritura sipas SETK-së ose të kryer VII/1 shkenca juridike, dhe i plotësojnë kushtet themelore të përcaktuara me ligj për themelim të marrëdhënies së punës.

(2) Notë për punën e tyre jep prokurori publik i Prokurorisë Publike në të cilën kanë themeluar marrëdhënie pune.

(3) Në Prokurorinë Publike të Republikës së Maqedonisë së Veriut ka këshilltarë të pavarur të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku 8 vjet përvojë pune në punë juridike pas provimit të dhënë të jurisprudencës, këshilltarë të lartë të Prokurorisë Publike, të cilët krahas kushteve të përgjithshme paragrafi (1) i neni, është e nevojshme të kenë së paku gjashtë vjet përvojë pune në punë juridike pas provimit të dhënë të jurisprudencës, këshilltarë të Prokurorisë Publike të cilët krahas kushteve të përgjithshme të paragrafit (1) i këtij neni, është e nevojshme të kenë së paku katër vjet përvojë pune në punë juridike pas provimit të dhënë të jurisprudencës dhe bashkëpunëtorë të lartë profesionalë të Prokurorisë Publike, të cilët krahas kushteve të përgjithshme nga paragrafi (1) i këtij neni është e nevojshme të kenë së paku dy vjet përvojë pune në punë juridike pas provimit të dhënë të jurisprudencës.

(4) Në prokuroritë e larta publike, prokuroria themelore publike për ndjekje të krimit të organizuar dhe korrupsionit ka këshilltarë të pavarur të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku tetë vjet përvojë pune në punë juridike pas provimit të dhënë të jurisprudencës, këshilltarë të lartë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku gjashtë vjet përvojë pune në punë juridike pas provimit të dhënë të jurisprudencës, këshilltarë të Prokurorisë Publike të cilët krahas kushteve të përgjithshme nga paragrafi (1) i këtij neni është e nevojshme të kenë së paku katër vjet përvojë pune në punë juridike pas provimit të dhënë të jurisprudencës, bashkëpunëtorë të lartë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku dy vjet përvojë pune në punë juridike pas provimit të dhënë të jurisprudencës dhe bashkëpunëtorë profesionalë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë të dhënë provimin e jurisprudencës.

(5) Në prokuroritë themelore publike ka këshilltarë të lartë të Prokurorisë Publike, të cilët krahas kushteve të përgjithshme nga paragrafi (1) i këtij neni, është e nevojshme të kenë së paku pesë vjet përvojë pune në punë juridike pas provimit të dhënë të jurisprudencës, këshilltarë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku katër vjet përvojë pune në punë juridike pas provimit të dhënë të jurisprudencës, bashkëpunëtorë të lartë profesionalë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë së paku dy vjet përvojë pune në punë juridike pas provimit të dhënë të jurisprudencës, bashkëpunëtorë profesionalë të Prokurorisë Publike të cilët krahas kushteve të përgjithshme nga paragrafi (1) i këtij neni, është e nevojshme të kenë të dhënë provimin e jurisprudencës dhe bashkëpunëtorë të rinj të Prokurorisë Publike.

Neni 97

(1) Rregullore për sistematizim të vendeve të punës të këshilltarëve dhe bashkëpunëtorëve të Prokurorisë Publike, si dhe vendim për numrin e tyre, miraton prokurori publik i Republikës së Maqedonisë së Veriut, përveç në rastet nga paragrafi (2) i këtij neni.

(2) Rregullore për sistematizim të vendeve të punës të këshilltarëve dhe bashkëpunëtorëve të prokurorisë publike, si dhe vendim për numrin e tyre për Prokurorinë Publike Themelore për Ndjekje të Krimit të Organizuar dhe Korrupsionit miraton prokurori publik themelor i Prokurorisë Publike Themelore për Ndjekje të Krimit të Organizuar dhe Korrupsionit .

24. NËPUNËSIT E PROKURORISË PUBLIKE

Neni 98

Të drejtat, obligimet dhe përgjegjësitë, si dhe sistemi i rrogave dhe kompensimeve të rrogave të nëpunësve të prokurorisë publike rregullohen me ligj.

Neni 99

(1) Rregullore për sistematizimin e vendeve të punës së nëpunësve të prokurorisë publike, si dhe vendim për numrin e tyre, miraton prokurori publik i Republikës së Maqedonisë së Veriut.

(2) Rregullore për sistematizimin e vendeve të punës së nëpunësve të prokurorisë publike, si dhe vendim për numrin e tyre për Prokurorinë Publike Themelore për Ndjekje të Krimit të Organizuar dhe Korrupsionit, miraton prokurori publik i Republikës së Maqedonisë së Veriut me propozim të prokurorit publik themelor të Prokurorisë Publike Themelore për Ndjekje të Krimit të Organizuar dhe Korrupsionit.

25. MJETET PËR PUNË

Neni 100

(1) Mjetet për punë të prokurorisë publike sigurohen nga Buxheti i Republikës së Maqedonisë së Veriut.

(2) Mjetet për punë të prokurorive publike sigurohen në Buxhetin e Republikës së Maqedonisë së Veriut nëpërmjet shfrytëzuesit buxhetor - Prokuroria Publike e Republikës së Maqedonisë së Veriut.

(3) Mjetet për punë të Prokurorisë Publike Themelore për Ndjekje të Krimit të Organizuar dhe Korrupsionit sigurohen nga Buxheti i Republikës së Maqedonisë së Veriut nëpërmjet shfrytëzuesit buxhetor-Prokuroria Publike e Republikës së Maqedonisë së Veriut.

Neni 101

(1) Në bazë të politikës fiskale dhe kategorisë kryesore për të hyrat dhe shpenzimet e vlerësuara, lartësia e mjeteve për punë në Prokurorinë Publike arrin së paku 0,4% nga Buxheti i Republikës së Maqedonisë së Veriut për vitin rrjedhës, nëse me këtë nuk prishet shpërndarja e drejtë e mjeteve buxhetore dhe nuk ndikohet mbi mjetet e planifikuara për të gjitha shpenzimet dhe zërat buxhetorë.

(2) Lartësia e mjeteve për punë të prokurorisë publike nga neni 100 i këtij ligji, përcaktohet në bazë të propozimit të prokurorit publik të Republikës së Maqedonisë së Veriut të cilin e dorëzon te Ministria e Financave. Mjetet nga ky paragraf përcaktohen në bazë të politikës fiskale dhe kategorive kryesore për të hyrat dhe shpenzimet e vlerësuara dhe cirkularit buxhetor të përcaktuar nga Qeveria e Republikës së Maqedonisë së Veriut për vitin e ardhshëm buxhetor dhe kriteret e brendshme dhe metodologjisë të përcaktuara nga prokurori publik i Republikës së Maqedonisë së Veriut.

(3) Propozimi për sigurimin e mjeteve për punë nga neni 100 i këtij ligji përmban vlerësim për punët e rregullta dhe të jashtëzakonshme të cilat i kryen prokuroria publike, numrin e nevojshëm të prokurorëve publikë dhe nëpunësve të prokurorisë publike, si dhe tregues të tjerë të cilët janë të rëndësishëm për përcaktimin e propozimit për përcaktim të shumës së mjeteve të nevojshme për punë të prokurorisë publike.

(4) Para dorëzimit të propozimit të Buxhetit të Republikës së Maqedonisë së Veriut te Qeveria e Republikës së Maqedonisë së Veriut, ministri i Financave në mënyrë të obligueshme e harmonizon pjesën e mjeteve për financim të prokurorisë publike me prokurorin publik të Republikës së Maqedonisë së Veriut. Nëse nuk arrihet pajtim, Ministria e Financave dorëzon raport të cilin e dorëzon te Qeveria e Republikës së Maqedonisë së Veriut dhe te Prokuroria Publike e Republikës së Maqedonisë së Veriut, ndërsa Prokuroria Publike e Republikës së Maqedonisë së Veriut te Qeveria e Republikës së Maqedonisë së Veriut dorëzon mendim për raportin e Ministrisë së Financave.

(5) Prokurori publik i Republikës së Maqedonisë së Veriut e përfaqëson dhe prezanton pjesën e mjeteve nga Buxheti i Republikës së Maqedonisë së Veriut për financim të prokurorisë publike, në mbledhjen e Qeverisë së Republikës së Maqedonisë së Veriut kur miratohet Propozim-buxheti i Republikës së Maqedonisë së Veriut dhe para trupave punues dhe në seancën e Kuvendit të Republikës së Maqedonisë së Veriut kur miratohet Buxheti i Republikës së Maqedonisë së Veriut.

Neni 102

(1) Lartësia e mjeteve për punë të Prokurorisë Publike Themelore për Ndjekje të Krimit të Organizuar dhe Korrupsionit përcaktohet në bazë të propozimit të prokurorit publik të Prokurorisë Publike Themelore për Ndjekje të Krimit të Organizuar dhe Korrupsionit të cilin e dorëzon te prokurori publik i Republikës së Maqedonisë së Veriut.

(2) Prokurori publik i Republikës së Maqedonisë me propozim të prokurorit publik themelor të Prokurorisë Publike Themelore për Ndjekje të Krimit të Organizuar dhe Korrupsionit mund të parashtrojë kërkesa plotësuese për financim të aktiviteteve të zmadhuara në punë.

(3) Rroga e Prokurorit Publik themelor të Prokurorisë Publike Themelore për Ndjekje të Krimit të Organizuar dhe Korrupsionit është 5% më e ulët se rroga e Prokurorit Publik të Republikës së Maqedonisë së Veriut.

(4) Rroga e prokurorëve publikë në Prokurorinë Publike Themelore për Ndjekje të Krimit të Organizuar dhe Korrupsionit caktohet në lartësi të rrogës së prokurorit publik të prokurorisë së lartë publike.

Neni 103

(1) Rrogat dhe kompensimet e rrogës së prokurorëve publikë rregullohen me ligj.

(2) Të drejtë të shtesës së rrogës nga paragrafi (1) i këtij neni ka edhe hetuesi në qendrën hetimore.

Neni 104

Prokuroria publike e Republikës së Maqedonisë së Veriut kryen shpërndarje të mjeteve të lejuara shfrytëzuesit buxhetor - Prokuroria Publike e Republikës së Maqedonisë së Veriut sipas prokurorive, në nivel vjetor dhe mujor, në bazë të matësve dhe kritereve.

Neni 105

Rrogat dhe kompensimet tjera të nëpunësve të prokurorisë publike dhe të punësuarve tjerë në prokurorinë publike, përcaktohen me ligj dhe marrëveshje kolektive.

Neni 106

(1) Kushtet hapësinore, mjetet materiale, pajisja dhe kushtet të tjera për punë të prokurorive publike i siguron Qeveria e Republikës së Maqedonisë së Veriut.

(2) Qeveria e Republikës së Maqedonisë së Veriut në propozim të Prokurorisë Publike të Republikës së Maqedonisë së Veriut miraton Program me lartësi të caktuar të mjeteve për ndërtim, rikonstruktim, mirëmbajtje të objekteve dhe pajisjeve të prokurorive publike dhe e përcakton dedikimin e tyre më të afërt.

(3) Për realizimin e Programit nga paragrafi (2) i këtij neni kujdeset Prokuroria Publike e Republikës së Maqedonisë së Veriut.

Neni 107

(1) Në Prokuroritë publike formohet sistem informatik si pjesë nga qendra e vetme informatike me bazë të të dhënave për organet e jurisprudencës në Republikën e Maqedonisë së Veriut.

(2) Prokuroria Publike e Republikës së Maqedonisë së Veriut kujdeset për mirëmbajtjen e bazës së vetme metodologjike dhe teknologjike të sistemit informatik të prokurorive publike.

(3) Shpërndarja e mjeteve në Prokurorinë Publike kryhet nëpërmjet sistemit për shpërndarje elektronike të lëndëve.

(4) Mënyra e shpërndarjes së lëndëve rregullohet me akt nënligjor që e miraton prokurori publik i Republikës së Maqedonisë së Veriut.

26. DISPOZITA KALIMTARE DHE PËRFUNDIMTARE

Neni 108

(1) Prokurorët publikë në Prokuroritë Publike dhe Prokurorët publikë në Prokuroritë Publike vazhdojnë ta kryejnë funksionin e tyre deri në përfundim të mandatit për të cilin janë zgjedhur.

(2) Procedurat e filluara deri në hyrjen në fuqi të këtij ligji, do të vazhdojnë në pajtim me dispozitat e këtij ligji.

(3) Lëndët nga kompetencat e Prokurorisë publike për ndjekjen e veprave penale të lidhura dhe që dalin nga përmbajtja e ndjekjes së paligjshme të komunikimeve të ndërmarra nga Prokurori publik i Republikës së Maqedonisë së Veriut sistemohen në Prokuroritë Publike për ndjekje të mëtejme penale në pajtim me kompetencat e tyre të përcaktuara me këtë ligj.

Neni 109

(1) Në afat prej 30 ditësh nga fillimi i zbatimit të këtij ligji, Këshilli i Prokurorëve Publikë i Republikës së Maqedonisë me propozim të prokurorit publik themelor të Prokurorisë Themelore për Ndjekje të Krimit të Organizuar dhe Korrupsionit do të miratojë vendim për rritjen e numrit të Prokurorëve Publikë në Prokurorinë Themelore Publike për Ndjekje të Krimit të Organizuar dhe Korrupsionit.

(2) Në afat prej 15 ditësh nga miratimi i vendimit nga paragrafi (1) i këtij neni, Këshilli i Prokurorëve Publikë të Republikës së Maqedonisë së Veriut do të shpallë konkurs për zgjedhje të prokurorëve publikë në Prokurorinë Publike Themelore për Ndjekje të Krimit të Organizuar dhe Korrupsionit.

Neni 110

(1) Prokuroria Publike nuk mund ta themelojë akuzën në bazë të materialeve të përgjuara në mënyrë të paligjshme.

(2) Përjashtim nga paragrafi (1) i këtij neni janë lëndët e Prokurorisë Publike për ndjekje të veprave penale të lidhura dhe të cilat dalin nga përmbajtja e ndjekjes së paligjshme të komunikimeve të parashtruara te gjykata kompetente deri më 30 qershor 2017 në pajtim me ligjin për prokurori publike për ndjekje të veprave penale të lidhura dhe të cilat dalin nga përmbajtja e ndjekja e paligjshme e komunikimeve.

(3) Materialet dhe transkriptat e materialeve nga materialet e përgjuara në mënyrë të paligjshme për lëndët e ngritura pas 30 qershorit 2017 mund të shfrytëzohen vetëm si indikacione dhe në to nuk mund të bazohet akti akuzues ose propozimi akuzues dhe ato nuk mund të propozohen dhe përdoren si dëshmi në procedurën për aktin e parashtruar akuzues ose propozimit akuzues.

(4) Materialet nga paragrafi (3) i këtij neni do të asgjësohen në afat prej tre muajsh pas përfundimit të procedurave për mjete të jashtëzakonshme juridike të lëndëve nga paragrafi (3) i këtij neni në pajtim me dispozitat për asgjësim të materialeve nga masat e veçanta hetuese të përcaktuara me ligj. Procesverbalet për asgjësim dorëzohen te Prokurori Publik i Republikës së Maqedonisë së Veriut.

(5) Të gjitha materialet e mbetura dhe transkriptet nga materialet e përgjuara në mënyrë të paligjshme të cilat nuk janë të dorëzuara në gjykata dhe të cilat nuk janë pjesë e lëndëve të cilat janë në fazë të hetimit në pajtim me paragrafin (3) të këtij neni, nuk mundet përsëri të përgjohen dhe të përdoren në cilëndo procedurë dhe asgjësohen në afat prej tre muajsh pas përfundimit të procedurave për mjetet juridike të jashtëzakonshme të lëndëve nga paragrafi (2) i këtij neni, në pajtim me dispozitat për asgjësimin e materialeve nga masat hulumtuese të veçanta të përcaktuara me ligj. Procesverbalet për asgjësim dorëzohen te Prokurori Publik i Republikës së Maqedonisë së Veriut.

Neni 111

(1) Prokurori Publik i Republikës së Maqedonisë së Veriut në afat prej 60 ditëve nga dita e hyrjes në fuqi të këtij ligji do t'i miratojë aktet nënligjore të parapara me këtë ligj.

(2) Këshilli i Prokurorëve Publikë të Republikës së Maqedonisë së Veriut në afat prej 60 ditëve nga dita e hyrjes në fuqi të këtij ligji do t'i miratojë aktet nënligjore të parapara me këtë ligj.

(3) Deri në hyrjen në fuqi të akteve nënligjore nga paragrafët (1) dhe (2) të këtij neni do të zbatohen aktet nënligjore të miratuara para ditës së hyrjes në fuqi të këtij ligji.

(4) Kuvendi i Republikës së Maqedonisë deri në fillimin e zbatimit të këtij ligji do ta harmonizojë Legjislacionin penal me Standardet Evropiane, gjatë të cilës në dispozitat kalimtare do t'i theksojë numrat e neneve të ligjit të ri të cilat korrespondojnë me nenet e Kodit Penal ("Gazeta Zyrtare e Republikës së Maqedonisë" numër 37/1996, 80/1999, 4/2002, 43/2003, 19/2004, 81/2005, 60/2006, 73/2006, 7/2008, 139/2008, 114/2009, 51/11, 135/11, 185/11, 142/12, 166/12, 55/13, 82/13, 14/14, 27/14, 28/14, 115/14, 132/14, 160/14, 199/14, 196/15, 226/15, 97/17 dhe 248/2018), të theksuara në nenin 32 të këtij ligji.

Neni 112

Me ditën e hyrjes në fuqi të këtij ligji shfuqizohen Ligji për Prokurori Publike ("Gazeta Zyrtare e Republikës së Maqedonisë" numër 150/2007, 111/2008 dhe 198/18) dhe Ligji për Prokurori Publike për ndjekje të veprave penale të lidhura dhe të cilat dalin nga ndjekja e paligjshme e komunikimeve ("Gazeta Zyrtare e Republikës së Maqedonisë" numër 159/2015).

Neni 113

Ky ligj botohet në "Gazetën Zyrtare të Republikës së Maqedonisë së Veriut", ndërsa hyn në fuqi dhe do të fillojë të zbatohet nga 30 qershori 2020.